


KOMUNYON

 . . .sa akong tutunlan tungod sa halos, kinse ka mga panerbisyo nga gipahigayon didto sa Arizona. Nagkaaduna gyud kami og maanindot nga panahon. Ang Ginoong Jesus nagpanalangin sa kanamo sa hilabihan, sa madagayaon gayud nga paagi. Gipaningkamotan nila nga ipatuman ang gamay'ng estratehiya nga iya sa Ginoo, ug nagasalig ko, nga kana ang tukmang paagi sa pagpahayag niini, ang pagsulod ug paghimo'g mga pagpadasig sa kasikbit nga mga dapit, usa. Miadto ko'g sayo mga pipila ka adlaw, nagpahigayon og napulo o dose ka mga panerbisyo sa tanang mga dagkung kasimbahanan sa tibuok Phoenix, Sa Sunnyslope ug Tempe ug Mesa ug sa mga kasikbit nga lugar didto, ug medyo nagpahigayon og mga pagpadasig sa tanang palibot ug dayon gidala kini sa lima ka gabii nga konbensyon. Ug kadto ang pinakadakung konbensyon nga among nahigayon sa Amihanang America. Daku kaayo kadto. Pinakadaku nga pamahaw, ug—ug ilabina ang—ang bangkete niadtong gabhiona.

² Dili na nako maihap kung pila kabuok ang nakadawat sa Espiritu Santo. Kadto'y—kadto'y kahibulongan kaayo ang gidaghanon niadtong nakadawat sa Espiritu Santo, ug kung pila kabuok ang nangaayo ug—ug nangaluwas, kadto—pagkamaanindot niadto. Busa mapasalamaton gyud kita sa Dios sa dihang makita nato ang pag-uswag sa panahon. Daghang bantugang tawo ang miabot. Usa sa . . .

³ Pabor gyud kini kang Igsoong Neville. Nakahimamat ako og usa ka Presbyterian nga ministro, gikan sa pinakainila nga Presbyterian College sa . . .niini nga nasud, nga nagasayaw siya diha sa Espiritu. Oh, grabe, talagsaon gayud kadto, nga iyang nadawat ang Espiritu Santo. Ug dayon ang sulti niya sa ako, ingon niya, “Nakakuha ako og usa sa mga teyp mo.” Ingon pa, “Dili kaayo maayo ang pagka-rekord niadto.” Ingon pa, “Medyo palaktawlaktaw kadto, pero,” ingon pa, “gidala ko kadto mismo sa kolehiyo nako ug gipatukar kadto.” Ug ang ingon . . .Isip usa ka inila nga tawo sa sikolohiya didto, gipahilum niya sila. “Bueno, nadungog nila Kini kausa, bisan pa man,” ang ingon niya. Ug ingon niya nga nagkaaduna siya . . .

⁴ Ug ang sulti nga nagasayaw kono siya diha sa diha sa Espiritu sa iyang simbahan, human nga iyang nadawat ang Espiritu Santo, ug ingon kono nila, “Reverend, kanus-a pa man ka makakat-on og bag-ong step?”

⁵ Ingon kono niya, “Sa diha nga nakakat-onan na sa kongregasyon ko ang kining usa.” Sa hunahuna ko medyo makahimuot kana, kabalo na mo, usa ka herarkiya sa

Presbyterian, oo, miingon, “Sa diha nga nakakat-onan na sa kongregasyon ko ang kining usa.” Busa maayo gyud kana nga butang. Sama sa usa ka gamay’ng bata, nga bag-o pa lang ug bisan pa siya. . . Bueno, nahibalo na mo kung unsa siya’y angay’ng mamahimo, para mahimong propesor sa sikolohiya sa pinakainila nga Presbyterian College didto sa Boston, bueno, anaa pa gyud kini sa Estados Unidos.

⁶ Nakita ko pud ang usa sa mga tig-opera sa kasingkasing didto sa Mayos nga nagasangyaw sa Ebanghelyo pinaagi sa Espiritu ug magsulti’g ubang mga pinulongan. Oh, grabe! Nakita ko didto ang usa pa ka espesyalista, nga usa ka Seventh-day Adventist, nga taga-didto sa. . . Siya’y usa—usa—usa ka espesyalista sa kasingkasing ug sa tutunlan pud, ug siya, nga usa ka tigulang na nga lalaki, nadawat ang bautismo sa Espiritu Santo. Nadawat niya Kini. Niadtong usa ka gabii nga gipandongan ko siya sa akong mga kamot didto sa nataran, ug nga iyang nadawat ang Espiritu Santo. Busa kita. . . daghan kaayong mga butang nga gibuhat sa atong Ginoo nga mapasalamatan gyud kita, ug ilabina sa atong mga nasaksihan niining higayona.

⁷ Dayon miingon ako kanila, “Naamgo ba ninyo kung unsang taknaa na karon sa diha nga ang nagakatulog nga dalagang ulay nagasugod na’g pangayo og lana?” Mao kanang higayon nga miabot ang Pamanhonon, ug mingsulod ang mga pinili, kadtong mga andam na. Oh, malipayon gyud ako sa pagkahibalo nga kita nagapuyo na niining katapusang mga adlaw. Kita n’yo? Nagatoo ko nga nagapuyo na kita sa usa sa labing makalilisang nga mga panahon nga nahibaloan sa kalibutan, sa bisperas mismo sa Pag-abot sa Ginoo. Dili ba pagkamaanindot niana? Pamalandunga ninyo, nga sa dili na madugay karon, ang tanang nahisulat sa Kasulatan halos nangatuman na! Ug mao nga nagapaabot kita nga sa unsa mang orasa moabot na Siya. Ug kinahanglan nga magkinabuhi kita sa ingon nianang mga pagpaabot, nga, sa unsa mang orasa kini mahitabo. Pag-ampo kamo sa kanunay, pagpangandam gayud!

⁸ Sa pipila ka mga pagpakighinabi karong adlawa, ako, nahitabo gyud, nga nahimamat ko ang usa ka misyonaryo gikan sa Formosa, usa ka maisogon nga babaye, nga setenta’y-tres anyos na ang panuigon, ug masaypan mong mga anaa sa kuwarenta’y-singko anyos pa lang. Ug siya’y usa—usa gihapon ka Miss, ug sigurado nga matahum gyud siya nga batan-ong babaye kaniadto. Ug ingon pa niya nga nagdako kono siya sa usa ka Cristohanong panimalay diin ang “oo” nagapasabot gyud daw og oo, ug ang “dili” nagpasabot gyud og dili. Ug siya gimatuto ilalum nianang estrikto nga pagpanudlo. Ug miingon siya, “Igsoong Branham, niadtong edad nga mga, oh,” miingon, “mga otso anyos, abi nako nga ako nang gitugyan ang akong kinabuhi kang Ginoong Jesus.” Ingon niya, “Niadtong mga

dose anyos pa ang akong pangidaron, nadani ako sa usa ka ministro sa denominasyon, nga kinahanglan makuha ko kono ang ikaduhang panalangin,” ug miingon, “ug nalimbongan gyud ko niadto.” Pero ingon niya, “Niadtong mga dise-siete anyos na ang akong panuigon, nadawat gyud nako ang Espiritu Santo.” Ug mibalik siya dinhi karon nga nagtinguha nga pukawon ang pipila niining nagakatulog nga mga iglesiang Baptist. Ingon niya kung—kung aduna man siya’y nakita nga “patay,” ania usa siya ka Baptist mismo, ingon niya, “mao kanang mga patay nga Baptist nga iglesia dinhi.” Gitawag niya sila og “mga morge.”

⁹ Miingon ko, “Bueno, siguro kung naa man gud ka sa panggubatan . . .” Nagtoo ko nga siya karon . . . Hunahunaa n’yo lang, nga ako, singkuwenta’y-dos na, samtang siya anaa na sa pagpangmisyon sa wala pa ko matawo. Ug dayon nagtoo ko nga tigulang na kaayo ko aron moadto sa natad sa pagpangmisyon. Ug nahunahuna ko, “Grabe, pasayloa ko, Ginoo.”

¹⁰ Ug siya, ingon nga maayo, listo ug manggialamon gihapon sama kaniadto. Ug iyang gisaysay kanako ang iyang mga kasinatian diha sa iyang panaw, ug kung unsa ka kinahanglanon ang Ebanghelyo didto sa Formosa ug—ug sa China, ug sa Japan, ug uban pa. Maong gipapauli na siya nila gikan sa natad sa pagpangmisyon, giingnan siya, “Dili na ka makaadto sa natad kung lapas na ka sa setenta, kabalo ka.” Maong gipapauli na siya nila. Apan dili gihapon siya moundang, motambong gihapon siya niining tanang mga konbensyon sa Baptist. Ug ingon niya, “Si Billy Graham,” ingon pa, “ang iyang pamaagi sa pagpadangat sa mensahe sa Baptist, dili-maayo para sa iglesiang Baptist.” Miingon pa, “Wala niya sila ginadala sa igo nga gilay-on aron mabatonan nila unta ang Espiritu Santo,” ingon niya. Oh, igsoong babaye, magpabilin kang ingon niana. Husto kana. Ingon niya, kadtong mga Intsik didto, ingon niya nga dili niya tugotan sila nga mopadayon lang ug moingon nga, “Nagatoo kami kang Jesus Cristo.” Miingon pa, “Maayo man kana,” pero ang ingon gipapabilin gyud niya sila didto hangtud nga adunay mahitabo, ug dayon nangahimo silang tinuod nga mga Cristohanon.

¹¹ Miingon ko, “Ingon niana ang pamaagi niini, igsoon. Ingon gyud sila, nga magpabilin sila hangtud nga adunay mahitabo.”

¹² Unsa kaha kung ang mga apostoles miingon, kaniadto, pagkahuman sa siyam ka adlaw, “Nagtoo kami nga nakabaton na kami Niini, kita n’yo, dawaton lang nato Kini pinaagi sa pagtoo ug magpadayon na sa atong buluhaton”? Kita n’yo, wala gyud unta kadto nagmalampuson. Nanaghulat sila didto hangtud nahibal-an nila nga aduna gyu’y nahitabo. Ug mao kana ang atong problema karon, dili gyud kita molahutay. Oo, mao kana ang hinungdan nga pagkahuman mahimo gihapon natong magkinabuhi og bisan unsang klase nga pagkinabuhi, nga bisan unsa ang ginabuhat, daw sa wala lang sa ato,

tungod kay wala man kita nagpabilin didto. Karon ania kita sa sulod, ugma anaa na pud ta sa gawas, ug mamaingon *niini* ug mamaingon *niana*. Kung maghulat lang unta kita hangtud nga makasulod ka ug isarado ang pultahan sa imong luyo, nan makapabilin gyud unta ka didto. Giselyohan na ka hangtud sa adlaw sa imong pagtubos. Nagmalipayon kaayo ko tungod niana.

¹³ Ug nagkaaduna kami og maanindot nga kahigayonan, sumala sa giingon ko na, didto sa Phoenix ug sa tibuok walog ug daghan sa mga Cristohanon didto, daghan kanila ang hugot gayud nga nagkupert sa tibuok nilang kusog.

¹⁴ Mitungas ko didto sa South Mountain, ang akong asawa dinha, ug ako. Usa ka adlaw niadtong, ang akong mga higala, ang akong igsoong lalaki, nga si Doc, ang nag-atiman sa akong duha ka anak nga babaye, ug—ug si Igsoong lalaki ug Igsoong babayeng Wood ang nag-atiman pud sa akong anak nga lalaki, ako ug akong asawa nagkaadunay ikaduha nga honeymoon. Ug ang ingon niya, “Bill, kabalo ka, mas gibati ko pa kini nga honeymoon kaysa sa una.” Ingon pa niya, “Sa unang higayon nga nag-honeymoon ta, nagsige ra gyud ko’g lingkod niadto ug naghulat sa imong pagbalik gikan sa pagpangayam,” ingon niya.

¹⁵ Migamit ko kaniadto og gamay’ng pamaagi, kabalo na mo. Sa hunahuna ko, “Bueno, karon, wala man gud ko’y daghang kuwarta.” Aduna ko’y gi-alkansiya diha sa usa ka lata sa baking powder, igo ra sa pagpangayam, ug magpakasal pud ko niadtong moabotay nga tinglagas. Busa nahunahuna nako, “Dunganon lang kaha nako kini,” kabalo na mo. Ug—ug samtang nangayam ko, mao na pud ang among honeymoon, kabalo mo, ug amo na lang gidungan. Mao nga niadtong higayona migasto gyud mi para niadto ug gidayon gyud namo, ug, grabe, nalingaw kaayo mi.

¹⁶ Ug kadaghanan sa kanila gikan sa tabernakulo dinhi. Nagatoo ako nga si Igsoong Sothmann, ang pamilya niya dinha sa likod, ug si Igsoong Tom Simpson ug ang uban pa, ug si Igsoong Maguire, ug nga kaming tanan nagmalipayon diha sa Ginoo.

¹⁷ Ug busa miadto kami sa South Mountain, nga naa ra sa habagatan sa Phoenix, ug nakapahilayo sa kapig-ot. Uh! Ang kapig-ot sa modernong siyudad! Dili ikatingala nga sa dihang nagsugod sa pagdaghan ang mga tawo sa yuta, ang sala, ug ang kriminalidad mitungha pud. Ug milantaw ako didto, ug naglingkod ako didto sa taas kaayo aron makita namo ang walog sa Phoenix, miingon ko sa akong asawa, “Pila na kaha ka higayon, sulod sa kinse ka minuto nga naglingkod ta dinhi, nga ang Ngalan sa Ginoo gigamit sa walay kapuslanan sulod nianang siyudad?” Hmm?

18 Halos, bueno, sa sentro sa siyudad mismo, apil ang Tempe ug—ug ang Sunnyslope, ug uban pa didto, nagatoo ko nga adunay mga usa ka milyon ka mga tawo niana nga walog. Miingon ko, “Tulo ka gatus ka tuig kaniadto wala gyu’y lain dinhi gawas sa mga cactus ug mga ihalas-nga-iro lang. Ug tingali, sa atubangan sa Ginoo, mas maayo unta kung nagpabilin na lang nga ingon niana sama kaniadto.” Husto kana. Bisan tuod adunay dagku—dagkung siyudad nga gitukod nila didto, ug kadtong matahum nga mga balay ug uban pa, maanindot gayud. Pero mas nindot gyud unta, mas maayo unta kung ang mga kalalaken-an ug kababayen-an nga naglakaw-lakaw didto sa kadalanan nagapataas sa ilang mga kamot, nga ginahimaya ang Dios ug ginapasalamat Siya. Pero, imbis nga ingon niana, atua hinoon didto ang pagpamalikas, pagpangbuhat og walay-pulos, ug pag-inom-inom. Mao nga pagmosulod ang sibilisasyon, nagasulod pud ang kadautan.

19 Miingon ko, “Pila kaha ka mga pagpanapaw ang nahimo kagabii, kagabii niining siyudad! Pila kaha ang nangahubog! Pila kaha ka panimalay... Pila kaha—pila kaha ka paglapas nga mga butang ang nahimo sa miaging oras, niining dakung siyudad!”

20 Ug misulti sa ako ang akong asawa, aduna siya’y gisulti nga sama niini, sa pagkahinumdom ko, “Unsa ma’y pulos ang pag-anhi nato dinhi kung ingon-ana? Nganong gusto pa natong mogawas sa balay para moanhi dinhi?”

21 Dayon ingon ko, “Ingon-ani man gud kini. Bisan pa nianang tanan, nga sa walay duhaduha naglangkob kana sa kadaghanan, pero aduna ma’y gamay’ng minorya didto. Pila kaha ka matitud-anon nga mga pag-ampo ang gihalad kagabii didto, aron nga makatambong sila sa panerbisyo?”

22 Ug maayo kaayo Siya kanamo nga ang mga kasimbahanan napuno na sa wala pa mosalop ang adlaw, nga dili na gani ka makasulod sa mga nataran sa palibot. Ug silang mga organisasyon ug uban pa, ug gibubo sa Ginoo ang Iyang Espiritu ug gipanalanginan sila. Wala gyud ko’y pugong-pugong, nagpadayon lang ko sa pagsaysay sa Ebanghelyo nga walay pugongpugong. Ug usahay, siyempre, medyo mabagison kini, pero mao ra kini ang bugtong paagi nga akong nahibaloan. Kinahanglan mabagison ka dinhi. Pero mas mabagison pagdidto ka na sa Hukmanan diin kinahanglan kitang manubag niini. Busa, sa kinatibuk-an, usa kini ka mahimayaon nga butang. Ug gusto namong magpasalamat sa niining iglesia dinhi tungod sa ilang mga pag-ampo ug pagsuporta kanamo, ug—ug sa pagpabilin kanamo nga duol sa krus.

23 Ug karon ania nakauli na pud pag-usab, dinhi, ug mianhi unta ako kaganinang buntaga tingali para mag-ampo alang sa pipila ka mga masakiton. Aduna ko’y daghang mga

pagpakighinabi nga naghulat lang kanako, mga kaso nga natipon sa miagi pang mga adlaw sukad sa akong pagbalik, nga naghulat og usa na ka bulan sukad nga wala ako. Busa gipanguhaan nila nga maatiman sila dayon sa ingon kadali, paanhion sila nga mga gikan pa sa nagkalainlaing mga dapit kon diin sila nahimutang.

²⁴ Kon itugot sa Ginoo, mga duha pa ka semana, moadto ako sa Tucson, didto sa ubos nga bahin. Ug karon ang mga negosyante niining higayona, aron nga inyong maiampo kini. . . Dili gyud ko gustong mobuhat og bisan unsa gawas kon toohan ko una nga kabubut-on kini sa Ginoo. Karon, ang mosunod nga konbensyon gitakdang ipahigayon didto sa Modesto ug human niana didto na sa Washington, sa estado, sa Washington, ug ngadto sa Zurich, dayon sa Palestina, ug dayon ngadto sa South Africa. Ug kana tanan mahitabo tali karon ug sa Hunyo. Ug gidapit ako para mahimong mamumulong niining tanan nga mga konbensyon. Ug tingali makahatag kini kanako og higayon nga makabisita pag-usab sa South Africa. Nagatawag sila, ngani makadawat mi og mga imbitasyon kada bulan. Pero kung usa. . .

²⁵ Adunay usa ka dakung pagkabahin-bahin sa mga iglesia, sa iglesiang Pentecostal. Ug kung moadto ka sa usa ka pundok, dili gustong makighilambigit niini ang pikas pundok. Ug dili sila magkigtimbayayong sa usa'g usa, mao nga ako gipugngan ko lang ang tawag sa pag-adto didto nga ania sa akong kasingkasing sulod sa mga lima na ka tuig. Ug karon, tingali kung dawaton ako sa mga negosyante, nga igo akong mapahiluna, diha sa maong duha ka pundok, nakita n'yo, ug aron nga matigum og mahiusa silang duha. Kinahanglan nga motambong ug makigduyog silang tanan tungod sa pinansyal nga panginahanglan sa ilang—ang mga panginahanglan sa ilang mga kasimbahanan atua didto, busa kinahanglan gyud silang motambong aron masalbar ang ilang dungog, nakita n'yo. Busa kini tingali ang kabubut-on sa Ginoo, pero, dili ko sigurado. Maanindot kini paminawon, pero dili ko sigurado niini.

²⁶ Ug dayon, niining tuiga, gihatagan ko ni Igsoong Borders og listahan sa biyahe, o, mga imbitasyon. Ug, sa tinuod lang, usa kadto ka libro nga doble ang kabaga nga *ingon niana* nga miabot sukad pa niadtong miaging Pasko, nga mga imbitasyon gikan sa nagkalain-laing lugar. Malisud kaayo para sa hunahuna sa tawo nga maadtoan kadto tanan, mao nga wala ko midawat ni usa man niadtong mga imbitasyon. Magpahigayon lang usà ko og usa ka panagtigum, ug maghulat ug tan-awon kung asa ang isulti sa Ginoo nga pagaadtoan ko sunod niana, human niana adtoan ko ang sunod, ug dayon ang sunod na pud, ug sa bisan asa nga Isulti Niya sa ako nga pagaadtoan. Busa, iampo ko ninyo.

²⁷ Nahinumdom ko niadtong miaging tuig, didto ila ni Igsoong lalaking. . . o si Igsoong babayeng Cox didto, sa dihang gitawgan ako ni Igsoong Arganbright para mouban niadtong biyahe

paingon sa Anchorage. Unsa kaha kung miuban ko niadto sa pagpamasin nga okey ra kadto?

²⁸ Bueno, nakahinumdom ko nga, ang *pagpamasin*, nagwali na ako mahitungod sa niana nga hilisgotan. Ingon ko nga sa dihang didto ako, akong giingnan ang mga tawo nga nagadumala sa mga teyp, “Ayaw kini i-teyp. Ayaw na kini i-rekord, kay iwali ko usab ang mao gihapong mga hilisgotan nga akong giwali dinhi.” Nagatoo ko nga ako nang nawali ang maong sermon nga akong nabuhat dinhi, pero ang tanang uban pa niini mga bag-o na. Ug nairekord ni Igsoong Maguire kini, ang tanan niini.

²⁹ Pagpamasin. Busa kung miadto ako didto, nga *nagapamasin* lamang, siguradong misangpot kini’g lahi kaysa sa tinuod nga nahitabo, wala unta natuman ang panan-awon. Pero ang panan-awon natuman, ug kamong tanan nahibalo niana, kung giunsa nga nagpanalangin gayud ang Ginoo.

³⁰ Karon, adunay laing butang nga dugay nang anaa sa akong kasingkasing. Iglesia, pag-ampo kamo alang niini. Kamong tanan dinhi nakahibalo nga sukad pa sa akong pagkabata wala gyud ko nakontento niining lugara. Ang tibuok kong kasingkasing kanunay nga nangandoy para sa Kasadpan. Ug nahinumdom ko niadtong nanghagbas ko og sagbot alang sa akong ugangang-babaye didto sa gamay’ng dapit nga mao ang...nga sakop sa simbahan dinhi, nianang dapita. Nagalingkod ako niadto sa hagdanan, ug ang Balaang Espiritu misulti kanako, miingon Siya, “Dili na Ako makapanalangin og dugang kanimo hangtud nga hingpit kang motuman Kanako, sama kang Abraham.” Kita n’yo? Ug, si Abraham, gisultihan siya sa Dios nga ihimulag niya ang iyang kaugalingon ug magkinaugalingon. Ug, sa dihang gibuhat na niya, iyang giuban ang iyang amahan, ang iyang pag-umangkon nga lalaki. Ug sa dihang si Abraham hingpit nga mituman sa Dios, nan hingpit nga nangatumanan ang mga saad sa Dios kaniya. Ug ang hikot, usa sa mga unang hikot nga naghikot kanako dinhi, mao ang akong inahan. Kabalo mo niana. Ug karon mibiya na ang akong inahan aron makauban ang Ginoong Jesus. Ug ako—wala ako kahibalo kung asa ko mopaingon, kung unsay akong buhaton, busa nga iampo ninyo ako.

³¹ Karon, si Igsoong Neville, sa akong pagsaka didto sa entablado, nahunahuna ko, “Bueno, moadto kaha ko didto.” Adunay mitagbo kanako ug miingon, “Grabe, daghan kaayo sila og panerbisyo karong gabhiona.” Miingon pa, “Aduna sila’y panerbisyo sa pagwali, pagnerbisyo sa pag-awit, panerbisyo sa pag-ampo, ug dayon pagpangolekta og mga halad, ug dayon nasulti pud nga magkaaduna kono sila’g—paghinugasay og tiil, komunyong, ug panerbisyo sa pagbautismo.”

³² Sa hunahuna ko, “Luoy’ng igsoon! Grabe! Grabe, tungod nianang tanan, nasayod gyud ko nianang tanan, kana’y

human pa gyud sa makapapakoy nga pagpangwali kaganinang buntaga.” Mao nga, nahunahuna ko, “Modalikyat kaha ko didto, basi’g hangyoon ko niya sa pagpahigayon sa komunyong.”

³³ Ug miingon siya, “Mahimo bang mamulong ka alang kanamo unyang gabii kung mabati mong gipangunahan ka?” Busa kabalo na ko kung unsa ang pasabot niadto. Busa mibalik ko ug mikuha og Kasulatan dinhi ug naghimo og pipila ka mga sinulat-pahinumdom, ug tingali ang Ginoo magatabang kanako sa paghatud og usa lamang ka hamubo nga Mensahe sulod sa mga upat ka oras, ug dayon ipahigayon na nato ang atong—ang atong paghinugasay og tiil, ug pagkahuman ang komunyong. Ug dayon, ug, oh, tingali, mahuman na ko sa dili pa niana. Dili, gitiawtiawan ko lang kamo. Siguro mga baynte, ngadto sa traynta ka minuto, ug dayon ato nang ipahigayon ang pagbautismo, paghinu- . . . Unsay sunod niini, ang komunyong ba? Ang komunyong na sunod niini, dayon ang panerbisyo sa pagbautismo.

³⁴ Karon, malipayon kami nga magpabautismo kamo. Karon, kung itugot sa Dios ug kana makapahimuot Kaniya, ug kung okey ra sa pastor ug sa mga tawo, sa sunod Dominggo sa buntag moanhi ako para iampo ang mga masakiton, ug aron mamulong, kung itugot sa Ginoo, karong umalabot nga Dominggo, tungod kay tingali sa sunod nianang Dominggo wala na usab ako. Ug karon samtang ania pa ko dinhi, gusto kong motambong ug—ug mamulong dinhi, tungod magkaabag kita dinhi ingon nga mga isigkamagtotoo, ug si Igsoong Neville ug ako dinhi, ug kami—gihigugma nato ang usa’g usa, ug kami—kami—gusto namo nga magpabilin nga suod ug magtinabangay sa usa’g usa ingon nga . . .

³⁵ Mora’g panamastamas kini kung paminawon, pero nanghinaut ko nga dili kini ingon-ana para sa inyo, usa niana ka higayon kaniadto miingon si Mr. Cory, siya . . . Anaa ko kaniadto sa usa ka kompanya sa lampara, nga namaligya og mga bombilya alang sa usa ka kompanya. Ug mipalit siya ug daghan kaayong mga bombilya nga magamit niya sulod sa upat o lima ka tuig, Ingon nga balus mipalit ko’g Ford gikan kaniya. Ingon niya, “Billy, nagatoo ko nga nagkinalotay ra ta sa atong likod.” Busa kana, bueno, medyo pamaagi kana sa pagtinabangay sa panahon sa panginahanglanon. Busa kana—husto kana. Kabalo kita kung unsaon pagsalbar sa usa’g usa ug pagtinabangay sa usa’g usa.

³⁶ Karon, moadto kita sa sinsero nga bahin niini karon, ug kung wala ko masayup, nagatoo ko nga si Igsoong Beeler ang nakita ko dinha sa luyo, usa na usab ka igsoong ministro. Ug karong adlaw sa akong pag-agi, akong namatikdan si Igsoong Junie Jackson nga nagtindog sa nataran uban ni Igsoong Creech. Aduna ba sila usahay og buluhaton dinhi? Panerbisyo sa pagbautismo diay, okey. Sige, mogahin kita og tubig kung

makakita sila'g tawong mabautismohan. Kita—aduna kita'y tubig, sige.

³⁷ Busa karon, ingon nga kita adunay igapahigayon nga komunyon, nahunahuna ko nga nindot kung maghisgot ko'g mahitungod sa komunyon sulod sa pipila lang ka minuto.

³⁸ Karon, sa dili pa nato basahon ang Pulong, atong ipadaplin ang tanan karon, ug ang tanan natong binata ug dili hamtong nga mga kinaiya, ug—ug mopaduol kita ngadto sa Presensya sa Dios pinaagi sa pag-ampo. Magaampo kita. Karon uban sa atong mga ulo nga giduko, ug gasalig ko nga mao usab ang atong mga kasingkasing, kung adunay mga paghangyo dinhi nga . . . gusto mong ipahibalo sa Dios, ug gusto mong hinumdoman ko ikaw atubangan sa Dios, ipahibalo kini pinaagi sa pagpataas sa imong kamot sa Dios. Ang Dios magahatag sa tanang gipangaliyupo sa matag usa.

³⁹ Makagagahum nga Dios, ang Amahan sa among Ginoong Jesus Cristo, Nga nagbanhaw Kaniya gikan sa mga patay ug nagpalingkod Kaniya sa toong kamot sa maong Halangdon, nga buhi hangtud sa kahangturan aron sa paghimo og mga pagpangaliya sa mga butang nga among gitooan nga Iyang gibuhat alang kanamo, ug isugid kini nga matuod gayud. Nagaampo kami, Ginoong Dios, nga karong gabhiona, nga Imong pasayloon ang among mga sala. Oh, gusto namong magpasilong ilalum sa Dugo sa tanang panahon, tungod wala kami masayod kon unsa gayu'y mahitabo. Ang tanan daw sa hapit nang matapos, og among mabati, Ginoo, nga ang pagbalik sa Ginoo haduol na gyud. Ug nagaandam kami alang sa usa ka panaw. Ug maingon nga nagahunahuna kami og usa ka pagpanaw, ginahunahuna namo ang pagdala og mga maleta, ug—ug dugang nga sinina ug dugang nga sapatos. Apan pagkalahi niini nga panaw! Dili kini pagpamutos; kondili kini mao ang pagpanghaw-as, ug pagpamiya. Sama sa gisulti sa Imong halangdon nga alagad, nga si Pablo, sa Basahon sa mga Hebreohanon, sa ika-12 nga kapitulo, “Isalikway nato ang matag kabug-aton ug ang pagkawalay-pagtoo nga sa dakung kasayon nagapiit paglikos kanamo, aron nga mahimo namong dalaganon nga mapailubon ang lumba nga gitanyag sa among atubangan.”

⁴⁰ Ug dili na kami karon makapagpropesiya og maayong mga butang sa niining modernong kalibutan. Ang bugtong butang nga among maipropesiya pinaagi sa Espiritu mao lamang ang mga hitabong dautan, mga kasamok, mga linog, mga balud sa linog, ang adlaw ug ang bulan nga nagakawad-an na og kahayag, ang iglesia nga anaa na sa Laodicea nga kapanahonan, si Cristo nga anaa gawas sa pultahan, nga nagapanuktok aron makasulod. Oh Dios! Sama kang Micheas sa kaniadtong panahon, unsaon niya pagpanalangin kang Ahab kung ang propesiya batok man kaniya? Sa diha nga ang maong halangdon

nga gamhanang propeta, si Elias, miduol kang Ahab, ug tungod kay iyang gikuha ang kinabuhi niadtong inosente nga tawo, nga si Naboth, busa miingon si Elias, “Ang mga iro magatilap sa imong dugo.” Nan unsaon man ni Micheas sa pagpanagna og maayong mga butang?

⁴¹ Unsaon man sa mga anak nga puno-sa-Espiritu karon nga makapanagna og maayo ngadto sa usa ka makasasala, walay-pagtagad nga mga tawo nga maoy nagpagawas sa Ginoo? Oh Dios, ang kapait lang sa paghukom sa umalabot ang makita namo. Ug nagapanawag kami ngadto sa mga wala nagkinabuhi og matarung, “Pagpangalagiw kamo paingon sa Ginoo, kay Siya mao ang Bato diha sa usa ka yutang malaay! Siya ang Salipdanan sa panahon sa bagyo. Ug ang Ngalan sa Ginoo maoy usa ka Gamhanan nga Tore, ug ang mga matarung nagadalagan nganha Niana ug may kaluwasan.” Madumduman gyud namo kadtong dagkung mga siyudad nga gitukod kaniadto, maingon nga dalangpanan, ug sa dihang ang manggugukod. . . niadtong usa ka tawo ug pagmakasulod na siya sa—sa maong tore, luwas na siya, ug walay makadagmal kaniya. Oh Dios, tugoti kaming makadalagan ug pagdangop ngadto sa Ginoo, kay Siya mao ang among Dalangpanan ug ang among Kalig-on, ug kanunay nga nagatabang sa panahon sa kalisdanan. Busa, makita namo pinaagi sa mata nga iya sa agila, sama kaniadto, pag-nagasugod na ang kagubot, nagakangitngit na ang mga panganod, nagasingabot na ang dalugdog ug kilat sa paghukom sa yuta, nasayod kami nga hapit na gyud moabot ang bagyo.

⁴² Karong gabhiona, Ginoo, nagaampo kami alang niining mga nagpataas sa ilang mga kamot dinhi. Wala ko nasayod kung unsa ang ilang gikinahanglan, Amahan, Ikaw lamang ang nahibalo. Nagaampo ako nga Imong ihatag ang tanan ngadto sa ilang bililhong mga kalag, nga girepresentar nianang gipataas nga mga kamot. Itugot kini, Ginoo. Ayoha ang mga masakiton. Hupaya ang mga gipangbudlayan. Hatagi og kalipay ang mga dinaugdaog. Hatagi’g kalinaw ang mga gipangbudlayan, hatagi’g pagkaon ang gipanggutom, og ilimnon sa mga gipanguhaw, kalipay sa mga nanagkaguol, og gahum sa iglesia. Ginoo, ihatud si Jesus nganhi sa among taliwala karong gabhiona, samtang nagaandam kami alang sa pagdawat sa komunyon nga nagrepresentar sa Iyang gipikaspikas nga lawas. Nagaampo kami, Ginoo, nga Siya moduaw kanamo diha sa usa ka talagsaon nga paagi.

⁴³ Panalangini kining gamay nga kongregasyon, ang minahal nga pastor niini, ang among Igsoong Neville ug ang iyang pamilya, ug ang mga diyakono, ang mga tinugyanan, ug ang matag ania dinhi karon. Panalangini usab ang uban, Ginoo, sa tibuok kalibutan, nga malipayon nga nanaghulat sa pag-abot sa Ginoo, nga gihikay na ang mga lamparahan, ug gipasinaw na og ayo ang mga pabilohan, ug ang Kahayag sa Ebanghelyo

nagadan-ag na ngadto sa mangitngit nga mga dapit.

⁴⁴ Karon, tabangi ako, Ginoo, uban niining pipila ka mga Pulong. Panalangini Kini samtang ginabasa namo Kini, ug ihatag kanamo ang unod niini, kay among ginapangamuyo kini sa Ngalan ni Jesus. Amen.

⁴⁵ Karon mahimo natong ablihan ang Basahon, ngadto sa ika-6 nga kapitulo sa San Juan, ug maayo gyud unta kung basahon sa matag usa kanato ang tibuok kapitulo inigpauli nato. Gusto nakong basahon, sugod sa ika-47 nga bersekulo, hangtud sa ika-59, lakip tanan, isip usa ka paagi sa pagpasukad og usa ka teksto sa hilisgotan mahitungod sa: *Komunyon*.

Si Jesus kini nga nagapamulong karon, didto sa fiesta. Halangdon kini nga panahon kaniadto, kini nga mga fiesta. Miinom sila sa tubig gikan sa bato, aron ihulagway kadtong Bato nga atua didto sa kamingawan kaniadto. Ug nanagpangaon sila, nga ginahulagway pud ang mana nga nangahulog kaniadto daghang gatusan ka mga tuig na ang milabay, isip paghandum. Usa lang kadto ka pagsaulog sa paskuwa, sama sa atong himoon karong gabhiona.

Sa pagkamatuod, sa pagkamatuod, nagaingon ako kaninyo, Ang motoo kanako may kinabuhi nga walay katapusan.

Ako mao ang tinapay sa kinabuhi.

Ang inyong mga ginikanan nanagpangaon sa mana didto sa kamingawan, ug nangamatay sila.

Kini mao ang tinapay nga nanaug gikan sa langit, aron ang tawo makakaon niana, ug dili mamatay.

Ako mao ang buhing tinapay nga nanaug gikan sa langit: bisan kinsang tawo nga mokaon niini nga tinapay, siya mabuhi sa gihapon: ug ang tinapay nga akong ihatag mao ang akong unod, alang sa kinabuhi sa kalibutan.

Busa ang mga Judio nanaglalisyang ang usa ug usa, nga nagaingon, Unsaon niining tawhana paghatag kanato sa iyang unod aron atong kan-on?

Busa si Jesus miingon kanila, Sa pagkamatuod, sa pagkamatuod, nagaingon ako kaninyo, Gawas kong kamo mokaon sa unod sa Anak sa tawo, ug moinum sa iyang dugo, wala kamoy kinabuhi diha kaninyo.

Ang mokaon sa akong unod, ug moinum sa akong dugo, may kinabuhi nga walay katapusan; ug ako magabanhaw kaniya sa katapusan nga adlaw.

Kay ang akong unod kalan-on gayud, ug ang akong dugo ilimnon gayud.

Ang mokaon sa akong unod, ug moinum sa akong dugo, magapuyo kanako, ug ako kaniya.

Ingon nga ang buhi nga Amahan nagpadala kanako, ug ako nagakinabuhi tungod sa Amahan: sa mao nga pagkaagi ang mokaon kanako, siya usab mabuhi tungod kanako.

Kini mao ang tinapay nga nanaug gikan sa langit: dili ingon sa inyong mga ginikanan nga nanagpangaon sa mana, ug nangamatay: pero ang mokaon. . . nini nga tinapay mabuhi sa gihapon.

Kining mga butanga ginaingon niya sa sinagoga, sa nagapanudlo siya sa Capernaum.

⁴⁶ Hinaut nga panalanginan sa Ginoo ang Iyang Pulong. Buut kong mamulong, sa pipila lang ka minuto, mahitungod sa: *Komunyon*. Unsa ba’y buot ipasabot sa pulong nga *komunyon*? Ang *pagkomunyon* nagapasabot og “panagsultihanay.” Aron adunay, panag. . . Ang tinuod nga kahulogan sa *komunyon* mao ang “magpakig-fellowship, makig-istoryahanay sa usa’g usa.” Kung nakig-estorya ka sa usa ka tawo diha sa telepono, aduna kamo’y usa ka panag-istoryahanay dinha, nagapakig-fellowship kamo sa usa’g usa. Ug kon kita maglain ug moadto didto sa luyo sa bilding, si kinsa man nga tawo kauban ang pastor, o bisan kinsang duha ka tawo, sila nagapakig-istorya sa usa’g usa.

⁴⁷ Karon, dili mahimo nga makipag-istorya ka pinaagi sa radyo, tungod kay dili ka makatubag, o sa telebisyon man. Pero kung. . . Mahimo nimo kini pinaagi sa telepono, tungod kay nagapakig-istorya man kamo sa usa’g usa, dili mahimo nga usa ra ka bahin ang nagapakig-istorya. Kini. . . Dili ako makapakigsultihanay kanimo karon, tungod kay dili man ka makatubag. Busa, sa ingon niana, dili kini pareho nga nagatambong ka aron madungog ang usa ka ministro nga nagahatud sa iyang mensahe. Dili ingon niana, ang pagpakighimamat sa usa’g usa, aron nagapakig-istorya. Dili ingon niana ang komunyon. . . Kung moadto ka aron lang makigsulti sa ministro, tawgon nimo siya sa usa ka kilid, o si kinsa man nga indibiduwal, ug makigsulti sa maong lalaki o babaye.

⁴⁸ Apan ang butang nga pagabuhaton nato, komunyon, mao’y para ang matag usa kanato ingon nga mga indibiduwal nga nagapakig-istorya ngadto kang Cristo. Mao kana ang nagapakig-komunyon. Busa, ang nagapakig-komunyon dili kay *usa* ra ang nagahimo sa pagpanulti, nga kitang tanan ang nagahimo og pagpanulti, kondili kita nga nagahulat ug nagapaabot kung unsa ang Iyang igatubag kanato.

⁴⁹ Karon, kasagaran, dinhi kita, nakahimo sa atong dagkung mga sayup, kanang, kita na lang ang nagasige’g sulti ug wala nagahulat ug wala nagahatag Kaniya og higayon aron

makatubag. Kita usahay, miingon, “Ginoo, nanghinaut ako nga Imong buhaton ang *ingon niini-ug-ingon niana* ug *ingon niini-ug-ingon niana*, amen,” ug motindog na ug mobiya na. Karon, dili gyud ingon niana ang nagapakig-komunyon. Pagpangayo lamang kana og pabor. Apan kung magpabilin gyud ka sa ingon ka dugay hangtud nga Siya nagatubag na, nan dinha ka nagapakig-komunyon, nagapakig-komunyon sa Ginoo. Karon, ug ang pinakamaayo nga paagi sa pagpakig-komunyon, mao ang nagkasabot mo, kinahanglan nga nagkauyonay mo sa pipila ka mga butang. Karon, ug makatilingala nga usahay kung madawat na nato kanang mga butanga . . .

⁵⁰ Ang pagkaon may kahilambigatan niini. Karon, pananglitan kining mga negosyante, kung gusto nila maghimo’g pakigsabot mahitungod sa negosyo, ilang imbitahon og panihapon ang ilang kasabot. Ug pagkahuman nila’g paglingkod ug pagpangaon, mag-istoryahanay dayon sila. Ang usa ka hanas nga mamaligyaay, kasagaran dili siya makigsulti sa usa ka tawo nga walay sulod ang tiyan. Labing maayo nga maghulat hangtud nga maayo ang iyang pamati, ug human na siyang nakapamahaw. Ayaw’g adto didto ug pukawon siya ug maghisgot dayon ka sa usa ka butang nga gusto nimong ibaligya kaniya, apan hulata hangtud nga nakapamahaw usà siya ug—ug anaa na sa saktong kondisyon.

⁵¹ Niadtong miaging adlaw, nagwali ako mahitungod sa babaye nga naghugas sa mga tiil ni Jesus, didto sa Canada ko kini gihisgotan, gi-istorya nga pag-adunay bisita nga mobisita sa usa ka tawo, adunay tinong mga proseso nga ilang kinahanglan maagian sa dili pa nila mabati nga puede nang moadto ug mobisita, o, makipag-komunyon. Ang pagbisita usa ka pagpakig-komunyon. Karon, moadto sila sa . . . Imbitado, kinahanglan una nga ikaw imbitado. Dayon pag-abot mo didto sa pultahan ug pagahugasan sa tagahugas ang imong mga tiil, tungod sa biyahe, manimaho ka og—ka og mga mananap ug uban pa diha sa dalan. Silang tanan . . . ang maong mga tawo nagbiyahe man gud sa samang dalan nga ginaagihan pud sa mga mananap, ug—ug mao nga manimaho ka ug maabogan, ug motuhop kini sa bisting pang-Palestino ug motapot sa gipaningot nga mga bitiis, ug sa nawong nga walay-tabon, ug—ug sa mga kamot. Ug—ug sugaton nila sila didto sa pultahan, kadtong tagahugas ang mosugat, ug aron hugasan ang mga tiil sa mga bisita. Ug unya may nagatindog nga laing lalaki didto nga may dalang tualya ug usa ka—usa ka alabastro, ug ilang iwisik-wisik kining alabastro sa mga kamot, ug ila kining ihaplas sama *nini*, ug—ug ihaplas kini sa ilang nawong, dayon mokuha sila og tualya ug pahiran ang ilang mga kaugalingon. Gitangtang na niana ang tanang hugaw ug baho. Ug kini adunay usa ka butang nga makahatag og pangpalagsik, sama sa menthol, ug nga makapaharuhay sa ilang paminaw.

⁵² Dayon sa ilang pagsulod, dili na nila isul-ob kadtong karaan'g hugaw nga sapin sa tiil, nga itunob sa kadtong matahum nga mga alpombra, sul-ob na nila ang medyo, usa ka gamay'ng tsinelas nga pang-balay, ug mosulod na dayon sila. Ug dayon ang—ang bisita mosulod ug—ug dayon ang tagbalay—abibihon sila pinaagi sa paghalok. Ug, kita n'yo, siyempre dili nimo gusto nga ang tagbalay mohalok kanimo kung nanimaho ka. Dili mo gustong motunob sa alpombra kung hugaw ka. Ug dayon ang tagbalay mohalok kanimo sa pag-abiabi, nga magpabati kanimo nga daw sama sa usa ka miyembro sa panimalay.

⁵³ Ug, karon, ang Dios adunay ingon niana nga mga butang. Aron sa pag-andam sa atong mga kaugalingon alang sa pagpakig-komunyon sa Dios, kinahanglan una nga mahugasan kita sa tubig sa Pulong. Ang paghimulag, mga tubig sa pagkahimulag nga nagahimulag kanato gikan sa atong mga sala. Karon, una gyud, dili ka makapakig-istorya sa Dios ug dili ka makapakig-komunyon sa Dios, ug adunay. . . Una, kinahanglan kang maghinulsol sa imong mga nabuhat, tungod dili gyud ka mahimong motoo sa hustong paagi gawas kung ikaw naghinulsol, “Ginoo, pasayloa ang akong dili-pagtoo.” Kita n'yo? “Pasayloa ang akong dili-pagtoo.” Kinahanglan ka nga maghinulsol, una. Ug, sa diha nga ikaw naghinulsol, nan ikaw. . . ang imong daang mga sala napasaylo na, dayon mahimo na kang kandidato alang sa pagpabautismo. Karon, pagkahuman gisaad Niya ang Espiritu Santo, pagkahuman sa pagbautismo.

⁵⁴ Karon, ang butang, nga, mahitungod niining pagpakig-komunyon, nahibaloan nato nga adunay usa ka—usa ka paghinugasay og tiil ug mga butang nga may kalabutan niana, usab, para hugasan ang atong mga tiil, ingon nga simbolo sa kalimpyo sa Balaang Espiritu.

⁵⁵ Karon, pagkahuman, adunay managsama nga pagbati. Kung aduna ka'y dili-maayong relasyon sa maong—sa maong tagbalay, kung ingon niana dili ka—dili ka makapakig-komunyon. Dili, nimo—dili nimo kini mahimo, kay duna man ka'y panagsupak kaniya. Pero kung nagkasinabot kamo, nan puede na kamo magpakig-komunyon. Busa ingon niana kini kung moduol kita sa lamesa sa Ginoo, kinahanglan nga aduna gyud kita'y panag-uyon sa Iyang Pulong. Kita n'yo? Kinahanglan nga natawo na kita pag-usab, nga ang Espiritu sa Dios nga anaa kanato nagaingon og “amen” sa matag Pulong nga Iyang gisulat, nan puede na kitang magpakig-komunyon Kaniya.

⁵⁶ Kini ang nabatonan nato gikan sa Dios, kon ang atong mga kasingkasing wala magsaway kanato, kung ingon niana anaa kanato ang kahimuot sa Dios. Hingsayran nato nga madawat nato ang atong mga gihangyo ug ang atong gipangayo, tungod kay ang atong mga kasingkasing wala magsaway kanato. Karon,

kon ang Dios nagsugo kanato nga kita kinahanglan matawo pag-usab, ug wala pa nato madawat ang bag-ong pagkatawo, kung ingon niana mabati nato ang pagkasalikwaut pagmoduol kita, ug mohangyo Kaniya sa bisan unsa, kita n'yo, tungod nahibalo kita nga wala pa nato gituman ang Iyang mga gikinahanglan. Ang bugtong nga mahimo nato mao ang pag-ampo nga iya sa makasasala. Apan nakigsultihanay kita Kaniya sa diha nga kita anaa sa pagpakig-fellowship Kaniya, kana ang nagahatud og pagpakig-komunyon.

⁵⁷ Karon, gusto kong ipasabot sa makadiyut, kining paagi sa komunyon. Karon, magadawat kita, sa atong ginatawag nga *komunyon*, nga mao ang tinapay ug ang bino. Karon, dugay na kining na mis-representar nga nahimong dili na maayong hisgotan. Oh, grabe ang pagka-misrepresentar niini sulod sa daghang nangaging mga katuigan! Dili kadto mao ang tinuod nga komunyon, pagsunod lamang kadto sa usa ka sugo. Kita n'yo? Karon, ang rason nga gitawag nato kini nga komunyon, tungod kay gikan kini sa Catholic association ingon nga mao kono ang “Balaang Eyukarista, nga literal kono kini nga lawas ni Ginoong Jesus.” Pero dili kini mao ang lawas ni Ginoong Jesus! Usa lamang kini ka paghandum sa Iyang lawas.

⁵⁸ Dili nako igsapayan bisan pila pa ka mga pari o mga magwawali, o si bisan kinsa pa ang magbendisyon niana, tinapay ug bino lang gihapon kana. Walay pari ingon nga atong . . . ang ginaingon nila kanato, nga, “Ang Dios obligado sa pagpamati sa pari sa diha nga iyang ginabuhat ang komunyon,” kadtung ginatawag nila nga komunyon, “ang Eyukarista, nga mamahimong literal nga lawas ni Ginoong Jesus. Dayon ipakaon kana sa magtotoo, ug komunyon na dayon kana.” Sayup gyud kana!

⁵⁹ Ang *pagpakig-komunyon* mao “ang pagpakigsulti ngadto, pagpakig-komunyon sa, usa ka butang ug kini magpakigsulti usab kanimo.” Mao kana ang pagpakig-komunyon. Ang ostya dili man makapakigsulti'g balik. Busa, sa tinuod lang, ang tinuod nga komunyon mao ang Balaang Espiritu nga nagapakigsulti'g balik. Kung mangutana ka Kaniya, dayon motubag Siya, mao kana ang husto nga komunyon. Ang *kini* usa lamang ka pagdumdum, ang pagdawat sa . . . mahitungod sa Iyang pagkalansang sa krus ug sa Iyang pagkabanhaw, ug dili kini mao ang komunyon. Ginatawag nato kini'g ingon niana, apan dili kini mao. Naggikan kana sa iglesiang Katoliko, sa pagdawat sa niining ostya nga sama sa atong gihisgotan niadtong miaging adlaw, ug gihisgotan nato ang bahin niini diha sa hilisgotan nga *Paganismo Batok Sa Cristianismo*.

⁶⁰ “Giunsa nga kining gamay nga lingin nga ostya nahimong mao ang literal nga lawas ni Cristo.” Karon, mao kana ang ginatoohan sa simbahang Katoliko. Namatikdan ba ninyo, sa dihang moagi sila sa simbahan, nagapangurus sila, ginatangtang

nila ang ilang mga kalo, ug uban pa? Dili kini tungod sa simbahan, tungod kana sa ostya nga anaa didto, “kadtong lawas nga gihimo kono sa pari gikan sa pagka-ostya ngadto sa pagka-literal nga lawas ni Cristo,” diin mahimo gani kining tangagon sa mga ilaga. Aba, dili kamo, makahunahuna ingon nga mga sibilizado man kaha kamo ug isipon ang usa ka tipik nga tinapay nga mao ang lawas ni Ginoong Jesus! Dili gyud mao.

⁶¹ Ang *komunyon* mao ang “pagpakig-istorya, naga-istorya pud kini balik, butang nga puede nimong maistorya.” Ang mismong pulong nga *pagpakig-komunyon* nagapasabot og “pagpakigsulti ngadto,” o, “nalambigit sa usa ka butang nga nakigpag-istoryahanay kanimo.” Ug ang Dios nagapakigsulti kanimo, nagapakig-komunyon. Apan kini tinapay ug bino ra sa gihapon, ang atong ginatawag og *komunyon*.

⁶² Karon, si Jesus miingon dinhi, sumala sa akong ginabasa, “Ang Akong lawas mao ang kalan-on ug ilimnon, ang Akong Dugo, lawas ug Dugo mao ang kalan-on ug ilimnon.”

⁶³ Karon, ato gustong hunahunaon si Jesus ug ato Siyang ginakonekta, kung unsa Siya kaniadto. Unsa ba ang Iyang lawas? Unsa ba ang lawas ni Cristo? Kini ang pundok sa mga magtotoo nga nahiusa uban Kaniya pinaagi sa Balaang Espiritu. Dili kadtong usa ka diosdios, dili kadtong usa ka tipik sa tinapay, kondili kadtong Espiritu nga anaa sa kasingkasing sa magtotoo, ug magkauban gyud sila, sa paagi nga ang tawo ug ang Diyos makapakigsulti sa usa’g usa, ang mga anak nga lalaki o mga anak nga babaye sa Dios. Ang mortal nga tawo, pinaagi sa pag-ula sa Dugo nahatagan og kapasayloan sa sala, ug kining lalaki ug kining babaye, batan-ong lalaki o batan-ong babaye, nga adunay pagpakig-fellowship kang Cristo, siya adunay pagpakig-komunyon diha Kaniya, ang lawas.

⁶⁴ Sama sa usa ka bana ug asawa nga nagalingkod ug naga-istoryahanay, o sama sa usa ka lalaki ug sa ang iyang uyab, si Cristo ug ang Iyang Iglesia nagapakig-komunyon sa usa’g usa. Mao kini ang hinungdan nga kita makapatalinghug gikan Kaniya, ug makita na ang umalabot sa dili pa kini mahitabo, ug mahimo natong matagna ang usa ka hingpit nga umalabot, tungod kay nagapakig-fellowship man kita sa usa ka Dios Nga ang Iyang kamot mao ang nagkupert sa Eternidad. Ang pagpakig-komunyon sa usa’g usa, ang Lawas ni Cristo, ang mystical, espirituhanong Lawas ni Cristo. Dili ang pagpakiglambigit sa unsa man nga matang sa diosdios, o sa usa ka tinapay o usa—usa ka bino, apan sa usa ka—usa ka espirituhanon nga perma.

⁶⁵ Karon, mao usab ang giingon ni Jesus. Ablihi ang San Juan, sa ika-4 nga kapitulo, mahitungod niadtong nakigsulti Siya sa babaye didto sa atabay, ug naghigot ang maong babaye bahin sa usa ka butang sama sa, “Ang among mga amahan

nanginom niining tuburan, ug nagkalot niining atabay, nga si Jacob, ug—ug nagahatag niining tubiga sa iyang mga anak ug sa iyang bakahan, ug moingon Ka nga, ‘Magsimba mo sa *niini* nga siyudad,’ ug ang uban nagaingon, ‘Sa niini nga bukid.’”

⁶⁶ Si Jesus sumala—sumala sa Iyang giingon kaniadto, “Kadali lang! Mga Judio kami, ug nasabtan namo kung unsa, ang kahulogan sa pagsimba. Apan patalinghugi kini, babaye. Ang takna taliabot na, ug mao na kini karon, nga ang mga matuod nga magsisimba magasimba sa Dios diha sa Espiritu ug sa Kamatuoran. ‘Ang Imong Pulong mao ang Kamatuoran.’ Ug nangita ang Amahan ug ingon-anang mga tawo nga magasimba Kaniya diha sa Espiritu ug sa Pulong, nga mao ang Kamatuoran. ‘Ang Imong Pulong mao ang Kamatuoran.’” Karon, Iya kining gisulti sa maong babaye.

⁶⁷ Kita n’yo, si Cristo. . . Ang Dios usa ka Espiritu. Ang *Cristo* nagakahulogan og “ang maong dinihogan, ang tawong dinihogan sa Dios,” nga nagpahimo Kaniyang Cristo. Karon, si Cristo miingon, “Ako Kalan-on ug Ilimnon.” Dili ang ostiya, dili kanang ostiya nga atong ginakaon dinhi. Dili kana mao si Cristo. Ang bino nga atong ginainom sa altar, dili kini si Cristo. Apan nagrepresentar lamang kini Kaniya, sa mahulagwayong paagi. Apan si Cristo mao ang Espiritu Santo, ang dihog nga anaa sa Iglesia, kana mao ang Kalan-on ug ang Ilimnon.

⁶⁸ Ang labing makaluluoy nga pagtuaw sa tibuok kalibutan, nanghinaut ko nga walay bisan usa kaninyo ang nakadungog na niini, apan, kung ugaling nadungog na ninyo kini, walay laing pagtuaw nga ikatandi sa pagtuaw tungod sa kagutom. Kung makita mo ang usa ka inahan uban ang iyang masuso, ug dili siya makalakaw tungod luya na siya kaayo, ug ang makaluluoy’ng masuso naghimalatyon na, nga mibutod na ang tiyan tungod sa kagutom, pagmadungog n’yo ang mga pagbakho nga gikan sa kasingkasing nianang inahan, sa pagkakita sa masuso nga lusno na ang mga aping niini hangtud nga ang mga niini bukog ug panit na lang, ug nanghubag ang gagmay nga mga lagos niini, ug dili na siya makahimo og pagtingog, halos, ug nibudlat na ang iyang gamay’ng mga mata. Wala gyu’y paghilak nga sama sa kagutom ug kauhaw.

⁶⁹ Didto sa mga disyerto, pagkadaghan nang mga tawo ang nawad-an sa ilang kinabuhi tungod sa kauhaw! Daghang mga sugilanon, nga mahurot ang atong tibuok gabii, mga tinuod nga istorya mahitungod didto sa disyerto. Kung unsa nga kamo’y. . . paggiuhaw na kaayo, mahitabo gyud nga magpakita sa inyo ang yawa og usa—usa ka lipat-sa-mata. Nasaksihan n’yo ang mga niini dinhi, dili na ninyo kinahanglan nga moadto pa sa Kasadpan aron makita kini. Biyahe mo didto sa kadalanan, ug mora kini og adunay tubig sa unahan. Ang matag usa kaninyo nga nagamaneho ug nagasige biyahe sa dalan, nakasaksi na niana. Kanay usa ka lipat-sa-mata. Dinhi dili pa lang dugay,

tingali tulo o upat ka tuig na ang milabay, nakabasa ko'g estorya bahin sa pipila ka mga pato, nga samtang naglupad sila patabok sa nasud, nakakita sila og usa ka lipat-sa-mata ug nangahulog sila diha sa dalan, sa pagdahum nga pasalum sila sa tubig. Ug nangawataswatas intawon sila, sa ilang pagkahagsa sa gahi nga dalan, sa pagtoo nga pasalum sila sa tubig, usa ka lipat-sa-mata.

⁷⁰ Pagkadaghan nang higayon nga gibuhat sa yawa ang ingon niana nga butang ngadto sa mga tawo, gihatagan sila og limbong nga lipat-sa-mata, diin, nga wala man diay og bisan unsa didto, kondili usa ka too-too lamang. Daghang mga tawo karon ang midawat og usa ka too-too lamang nga relihiyon, nagasulay sa pagbuhat og mga tinumotumo o nagpakaaron-ingnon nga adunay sa kung unsang butang apan wala gayud! Sama sa giingon sa misyonaryo nga babaye nga naghulat gayud siya hangtud nga nasigurado gyud niya. Kinahanglan nga buhaton pud nato kana. Tungod dili ka na puedeng mobalik ug sulayan na usab. Aduna ka'y usa ra ka higayon, ug nadawat na nimo ang Blueprint, busa siguradohon gyud natong direktso kita sa dauganan.

⁷¹ Ang pagtuaw tungod sa kagutom, paminaw, usa kini ka grabe nga pagtuaw tungod kay kini usa ka makapaguol nga pagtuaw. Naghimalatyon na ang maong tawo. Ug, oh, kung moabot lang kita sa ingon niana nga kahimtang, kung kini nga nasud moabot lang sa maong kahimtang nga gigutom pag-ayo para sa Dios! Usa kini ka mas grabe nga kagutom kay sa pisikal nga kagutom nga nasinati sa mga nasud sama sa India, kini nga nasud nagaantus na karon sa espirituwal nga kagutom. Pero pagmahitabo nga mapalagpas og ayo ang gutom nimo, moabot gyud sa punto nga dili ka na mobati nga gigutom diay ka.

⁷² Sama ra kini sa pagbagtik tungod sa katugnaw. Human nga miabot na ka sa punto, sa pagkabagtik, nga mibati ka'g grabeng kabugnaw, dayon human sa hamubo nga panahon manginit ka na. Ug pag ingon-ana ka na, nan naghimalatyon ka na! Ug mao kana ang nagakahitabo karong gabhiona. Ang mga kaiglesiahanan misangpot na sa tumang pagkabugnaw nga daw nabagtok na sila, ug naghunahuna nga nagmainiton gihapon sila, tungod sa gidaghanon sa ilang mga miyembro, ug himalatyon na diay sila sa espirituwal. Naghimalatyon na! Wala nila hingsayran kini. Sa ulahi, siya mihigda aron matulog, ug mao na diay kana ang katapusan. Wala na siya nakamata, tungod kay nabagtok na iyang dugo sa iyang mga ugat.

⁷³ Karon, ang pagkauhaw. Ang gisulti ni Jesus miingon, "Ang Akong Dugo mao ang tinuod nga ilimnon." Kung nagakauhaw ka alang sa Kinabuhi, nagakauhaw ka sa Kinabuhi, si Jesus lamang ang adunay bugtong tubig nga makatagbaw sa maong kauhaw. "Umari Kanako, kamong tanan nga gikapuyan ug gibug-atan." Diha sa Pinadayag, nag-ingon kini, "Ang si kinsa man nga giuhaw paanhia siya sa mga tuboran sa tubig sa

Kinabuhi ug paimna siya nga walay-bayad.” Kung nagakauhaw ka sa Kinabuhi!

⁷⁴ Makita nato nga ang mga astronomo nagapanagna, nga sa mga sayo nga bahin o sa unang bahin niining bulan, sugod sa ikaduha o ikalima, o sulod niining bulana, ang mga astronomo sa India nagtagna nga ang kalibutan madugmok. Ug ang mga mantalaan sa Amerika nagbiaybiay niini. Dili man ko motoo nga ang kalibutan madugmok, pero mosulti ko nga sayup gyud ang pagbiaybiay niini. Tungod kay, aduna gyu’y gikatakang mahitabo usa niining mga adlawa, usa ka butang nga susama niana, sa dihang ang lima ka mga planeta, Mars, Jupiter ug Venus, ug—ug uban pa, maglaray sa ilang—ilang. . . Wala pa gyud kini mahitabo sa ila kaniadto. Oh, miingon sila nga mahimong nahitabo kini baynte-singko ka libo ka tuig ang milabay, pero kinsa man ang atua niadtong panahona aron masayran kadto?

⁷⁵ Akong gina-prediktar nga aduna kini og espirituhanong aplikasyon. Nagatoo ko nga kini ang pagsulod sa mga kapadayagan mahitungod sa Dios, diin ang dagkung mga pagpadayag sa Pulong pagaablihan na niining panahona. Hinumdumi, ilang giingon nga ang tulo ka mga bituon ang naglaray sa ilang orbito sa dihang natawo si Jesus kaniadto. Ug lima kini, ug ang lima nagrepresentar sa grasya, ang numero sa grasya. Ang tulo mao ang numero sa kahingpitan. Ang lima mao ang numero sa grasya, J-e-s-u-s, g-r-a-c-e, f-a-i-t-h, ug uban pa. Ang numero sa grasya! Kung ang Dios magpadala sa Iyang gahum ngadto sa iglesia, kini pinaagi sa Iyang grasya, dili tungod sa pagkamasinugtanon sa mga tawo. Ug ingon ni Isaias, sa ika-40 nga kapitulo, kung unsaon ang “pamantala ngadto sa Jerusalem, nga natapos na ang iyang pagpakiggubat,” bisan nga sad-an siya sa pagsimba sa mga diosdios, pero ang grasya sa Dios mao ang nagpadala niini. Kung ang Dios magpadala ug bisan unsa ngari kanato, kini tungod sa Iyang grasya, ug dili tungod sa atong mga maayong nabuhat. Busa, mahimong nagpasabot kini og usa ka butang. Akong gina-prediktar nga aduna gyu’y mahitabo nga pagbag-o. Wala ko kabalo kung unsa kini, apan nagatoo ko nga duol na gyud kini mahitabo. Anaa na kita. . . sa mismong bisperas niini karon.

⁷⁶ Ug kon adunay gigutom, paduola siya kang Cristo. Kon aduna ma’y giuhaw, paduola siya kang Cristo. Siya ang nagatagbaw sa maong kauhaw. Siya ang Magtatagbaw sa tanan natong kauhaw ug kagutom.

⁷⁷ Adunay sugilanon nga gisulti sa ako kaniadto pa. Tingali nasulti na nako kini dinhi nga simbahan. Kung nasulti ko na, pasayloa ko sa pagsulti niini pag-usab para lang maihatud ang pipila ka mga punto. Adunay usa ka Indiano nga magtutultol, o, mora’g usa ka tagdumala sa mga Indiano. Nagabiyahé siya kaniadto sa lalawigan sa Navajo, ug didto, nasaag kini. Ang iyang ngalan mao si Coy. Ug ginasubay niya kadtong usa ka

agianan, usa ka pang-dalan sa mananap, ug sa iyang hunahuna, “Karon, kung sundon lang nako kini nga agianan, siguradong makakaplag gyud ko’g tubig.” Ug ang iyang kabayo giuhaw na pag-ayo nga nagbitay na ang dila niini, uga na kaayo, ug mipula na ang buho sa iling niini ug napuno pa gyud sa balas. Nagtabon siya og panyo sa iyang nawong tungod niadtong mga bagyo-sa-balas hangtud nga napuno na gyud kini, ug hapit na gyud siya mamatay tungod sa kakulang, sa tubig. Ug gigiyahan niya ang iyang kabayo sa dihang nakita niya ang maong masigpit nga agianan. Ug ang ingon niya, sa dihang pagsakay niya sa kabayo nakita niya ang pang-dalan sa mananap, miingon, “Siguradong dad-on gyud ko niini sa tubig.” Busa misakay siya sa iyang kabayo ug misugod sa pagsubay sa maong agianan.

⁷⁸ Ug ang kabayo nahibalo usab nga mao kadto ang agianan paingon sa tubig. Pagkamaayo gayud sa Dios nga nagahatag og kinaiyahang-kahibalo ang dili-makasulti nga mga mananap! Ug padayon nilang gisubay ang maong agianan. Sa kadugayan, adunay pipila ka mga likoon ang mitungha paingon sa usa ka direksyon, nga nagtipas gikan sa niadtong dalan nga pirming giagian. Gusto sa kabayo nga moliko nianang direksyon, pero si Coy adunay ubang ideya. Gisulayan niya nga mandoan kini nga mopadayon ngadto sa kinadak-ang agianan, ug gisugdan niyang subayon kadto, ug ang kabayo dili mosubay niadto. Gipaabante gyud niya kini pinaagi sa espuwela, ug mibahihi lamang kini ug nagpadulong hinoon sa ubang dalan. Ug hinayhinay gyud kining nagaatras. Grabe na kaayo kaluya ang kabayo para mosupil pa sa iya.

⁷⁹ Busa gigamit na pud niya ang espuwela pag-usab, hangtud nga nasamaran niya ang kabayo, tungod sa paghinamhinam nga makakaplag og tubig, aron nga maluwas ang iyang kinabuhi, hangtud nga nagbarug na lang didto ang kabayo, nga nagpangurog, ug nagkadugo. Ug sa pagdungo niya, iyang nakita didto, nga nagapangurog na diay ang kabayo og ingon *niana* ug halos na gyud matumba samtang nagasakay siya. Gitan-aw niya ang kabayo, ug nakita niya ang dugo sa kilid niini. Usa man unta siya ka Cristohanon. Ug miingon siya sa iyang kabayo, ingon niya, “Kanunay kong madungog nga ang ihalas. . . o, ang mga mananap adunay kinaiyahang-kahibalo. Mora’g dili man gud diha sa gagmay’ng mga likoanan ang padulong didto sa may tubig. Tingali kining daku nga dalan dinhi ang agianan sa kung asa sila kanunay nagaadto alang sa tubig, pero,” ingon pa niya, “kung matinud-anon nimo akong gidala hangtud karon, akong sundon ang imong kinaiyahang-kahibalo.”

⁸⁰ Oh, grabe ang pamalandong ko niana bahin kang Cristo! Ang dalan padulong sa kalaglagan gibutangan ug mga timaan aron dali ra gyud matultolan, apan adunay usa ka hiktin nga dalan nga padulong sa Kinabuhi. Diyutay ra gyud ang makakaplag Niini. Lamang, dili tungod sa kinaiyahang-kahibalo, kondili

tungod sa Balaang Espiritu nga magatultol kanimo ngadto sa tubig sa Kinabuhi. Ako nagatoo nga, gidala ako Niini nga luwas hangtud karon, nan padayon ko Kining saligan sa tanan kong nahabilin nga panaw.

⁸¹ Sa pagtapos sa maong estorya, siya—wala pa gani siya nakabiyahе og tunga sa milya, pagkataudtaud, sa kalit lang, ang iyang maunongon nga kabayo diretsong mituslob sa usa ka dakong lim-aw nga tubig. Nahibalo gyud ang kabayo sa buot ipasabot niini, kung usa ang buot niyang ipadangat ngadto sa—sa nagsakay niini. Mituslob pud siya didto. Ang sulti pa niya nga gihilam-usan niya og tubig ang ilong sa kabayo. Naligo siya didto, nagsinggit siya ug nagtiyabaw siya, ug misiyagit siya sa sobra nga kakusog kutob sa mahimo niya, ug ginabubo ang tubig sa tutonlan niya, ug misinggit, “Naluwas kami! Naluwas kami! Naluwas kami!” Ug ang kabayo, miinom, ug nagapangurog. Ug gitan-aw ni Coy ang kilid sa kabayo nga nagkadugo, nga puno kaayo og samad gumikan sa espuwela.

⁸² Ug niadtong higayona, ingon niya . . . nakadungog siya nga adunay miingon, “Haw-as diha sa tubig.” Ug milantaw siya didto, ug adunay usa ka cowboy nga may pisikal-nga-diperensya nga nagatindog didto. Ug dayon mikawas siya sa tubig niadto. Ingon niya nakapanimaho kono siya’g sunog, ug milingi siya didto, ug adunay usa ka pundok sa mga kalalaken-an nga nagtolda didto. Nakasul-ob sila og pagpamulawang sinul-oban. Nakasuhid sila niadtong lugara og pipila ka bulawan, ug sa dalan nila pabalik aduna sila’y mga kabayo ug kargadong mga kabayong dala, ug nakaabot sila niadtong lim-aw nga tubig ug nagpahulay, ug nangahubog silang tanan.

⁸³ Ug ang ingon aduna kono sila’y giluto nga karneng lagsaw, ug siya mikaon uban kanila. Ug miingon, miingon kono ang usa niadtong mga lalaki, “Imna kini.” Gipaila niya sa ila kung kinsa siya, nga siya si Jack Coy, ang—ang Indiano nga tagagiya. Ug miingon kadtong usa ka tawo, “Bueno, siге, inom na.”

Ingon niya, “Taysa lang,” ang ingon niya, “Dili ko nagainom niana.”

⁸⁴ Ug medyo usa kadto ka insulto para niadtong mga tawhana. Busa miingon kadtong tawo, “Kinahanglan nga makig-inom ka kanamo!”

Ingon ni Coy, “Taysa lang, dili ko nagainom niana.”

⁸⁵ Pero gitunol gihapon sa tawo ang pitsil, ug miingon, “Inom na!” Mga hubog na, silang tanan, kabalo mo, siguro mga tunga sa dosena sila.

Ug mao nga gisulti na lang niya, “Salamat, mga amigo.”

⁸⁶ Miingon, “Kung lami kaayo kaonon kining karneng lagsaw namo, lami pud kaayo imnon kining among vino.”

87 Ug kabalo na mo kung unsa ang mga tawo, paghubog na. Dayon ingon niya, “Dili,” ang ingon niya.

88 Ug nagkarga sila og bala sa riple, ug miingon, “Karon moinom ka na gyud kay kondili!”

89 Ingon niya, “Dili. Dili, dili gyud ko moinom.” Ug gition na niadtong tawo ang riple. Ang ingon, “Kadiyut lang.” Miingon, “Dili man ko mahadlok nga mamatay.” Ingon niya, “Ako—dili man ko mahadlok nga mamatay.” Ingon pa niya, “Pero akong—gusto nakong isulti kaninyo ang akong estorya sa dili pa ko mamatay, ang hinungdan nga dili gyud ko moinom.” Miingon, “Taga-Kentucky man ko.” Ingon niya, “Ug didto sa usa ka gamay’ng karaang trosong payag usa niana ka buntag, kon diin nagahigda si mama nga naghimalatyon na, gitawag niya ako sa kilid sa iyang gihigdaan, ug miingon, ‘Jack, namatay ang imong amahan nga aduna pa’y gigunitan nga mga baraha, og nagbuyod sa usa ka lamesa, nga hubog.’ Ug miingon, ‘Ayaw gyud pag-inom-inom, Jack, bisan unsa pa’y imong ginabuhat.’” Ug ang ingon, “Sa agtang sa akong inahan gibutang ko ang akong mga kamot. Ug nagsaad ako sa Dios, ingon nga usa ka gamay’ng diyes-anyos nga batang lalaki, nga wala gyud ko sukad motilaw og unang inom.” Ingon niya, “Wala pa gyud ko sukad miinom niana.” Ug ang ingon, “Karon kung gusto n’yo kong pusilon, pusila na lang.”

90 Ug sa dihang gition sa hubog ang iyang riple ug gitunol pag-usab ang pitsil, miingon, “Imnon nimo kini o pusilon ka nako!” Ug dihadhiha dayon mibuto ang pusil ug nabuak ang pitsel.

91 Atua diay didto nagatindog sa kilid sa usa ka canyon ang usa ka gamay’ng tigulang nga cowboy, nga may pisikal-nga-diperensya, nga may nagadagayday’ng luha sa iyang mga aping. Miingon siya, “Jack, gikan pud ko sa Kentucky. Nagsaad pud ko sa akong mama usa niadto ka adlaw, pero napakyas ko sa pagtuman sa akong saad.” Miingon siya, “Naghulat lang ko nga mahubog na kaayo kining mga tawhana, ug pamatyon unta nako silang tanan, nianang higayona, og kuhaon ang bulawan nga naa nila.” Miingon siya, “Pero palahubog ko kaniadto ug aduna ko’y nabuhat nga mga sayup. Pero,” miingon pa, “Sigurado ako nga sa dihang ang tingog sa akong pusil molanog na didto sa mga canyon sa Langit, madungog sa akong inahan ang akong saad nga dili na gyud nako kini buhaton pag-usab.” Ug didto, pinaagi sa grasya sa Dios, iyang giagak kadtong mga tawhana ngadto kang Cristo, ang tanan nga atua didto.

92 Kita n’yo, aduna gayu’y usa ka butang bahin sa tubig, butang nga nagadala og kahayahay. Ang ginapunto ko, mao ang pag-adto dayon sa tubig pagginauhaw ka. Aduna gyu’y butang nga mahimo niini kanimo, mao nga pagpangita gyud og tubig kung ikaw giuhaw.

93 Karon, si Jesus miingon, “Ibilin Ko kaninyo ang kalinaw. Ihatag Ko kaninyo ang Akong kalinaw.” Dili sama sa ikahatag sa kalibutan nga kalinaw, kondili ang kalinaw nga igahatag Niya kaninyo. Ang Iyang kalinaw ang nagatagbaw sa atong kauhaw. Kung kita nangandoy og kalinaw, nan magpa-refresh kita diha sa Iyang kalinaw, sa pag-ila nga kita adunay pakigdaat sa Dios pinaagi sa atong Ginoong Jesus Cristo. Siya ang atong Maghahatag-og-kalinaw nga nagatagbaw sa atong kauhaw.

94 Sumala sa ginaingon sa bersekulo nga Siya ang tinuod nga Kalan-on ug tinuod nga Ilimnon. Aduna ko’y mubo nga gimarkahan dinhi, sa ika-57 nga bersekulo, “Tinuod nga Kalan-on ug tinuod nga Ilimnon.” Paminawa kung unsay Iyang gisulti dinhi.

Ug ingon nga ang buhi nga Amahan nagpadala kanako, ug ako nagakinabuhi tungod sa Akong Amahan: sa mao nga pagkaagi ang mokaon kanako, siya usab mabuhi tungod kanako.

95 Sa laing pagkasulti, “Ang Amahan nagpadala Kanako, ug Ako nabuhi pinaagi Kaniya. Ug ang matag tawo nga nagaduol kang Cristo kinahanglan magkinabuhi pinaagi kang Cristo.” Oh, grabe, tan-awa, mao kana ang komunyong. Mao kana ang tinuod nga komunyong nga imong makaplagnan kung ikaw magkinabuhi pinaagi kang Cristo.

96 Karon, ang atong mga lawas nagkinahanglan og pagkaon ug ilimnon kada adlaw, aron mabuhi, ang atong pisikal nga lawas. Kon dili kita mokaon ug moinom kada adlaw, mohuyang ang atong lawas. Aduna gyu’y butang sa sulod nato mao nga nagkinahanglan kita og pagkaon. Ang imong gikaon sa usa ka adlaw dili na molungtad sa sunod nga adlaw. Kinahanglan gayud nga mokaon ka matag adlaw, aron mapalig-on ang imong mortal nga panglawas. Mahimo man kang mabuhi, apan luya ka na. Ug sa ikaduhang adlaw, mas nagkaluya ka pa. Ug sa ikatulong adlaw, grabe na imong kaluya.

97 Bueno, ingon niana ang ginabuhat nato sa daghang mga higayon diha sa espirituhanong bahin. Kita n’yo, matag adlaw kinahanglan gyud natong makipag-komunyong kang Cristo. Kada adlaw gyud kita kinahanglan makigsulti Kaniya. Kinahanglan kitang makighusay Kaniya matag adlaw. Miingon si Pablo, “Nagakamatay ako matag adlaw.” Kita n’yo? “Matag adlaw, nagakamatay ako; apan ako nagakinabuhi, dili ako apan si Cristo nga nagapuyo kanako.” Busa, kung ang imong pisikal nga lawas nanginahanglan og pagkaon matag adlaw ug ilimnon matag adlaw, aron mabuhi, ang imong espirituhanong lawas nanginahanglan usab og espirituhanon nga Pagkaon ug pagpakig-komunyong diha sa Ginoong sa matag adlaw, aron mabuhi. Oo. Miingon si Jesus, “Ang tawo dili mabuhi sa tinapay lamang, kondili pinaagi sa matag Pulong nga nagagula sa baba

sa Dios.” Busa, matag adlaw kinahanglan kitang magtuon sa Biblia. Ang ubang mga tawo wala gyud nagatuon Niini. Ang uban nagapunit lamang Niini matag duha o tulo ka beses sa usa ka tuig. Apan, ang usa ka tinuod, tinuod nga magtotoo nga malig-on sa espirituwal, kanunay nagabasa sa iyang Biblia kada adlaw, ug nagapakigsulti sa Ginoo. Husto kana. [Blanko nga bahin sa teyp—Ed.] Kinahanglan gyud niya. “Ang tawo dili mabuhi sa tinapay lamang, kondili pinaagi sa matag Pulong nga nagagula sa baba sa Dios.”

⁹⁸ Karon, usa pa ka butang kon ngano kitang nagakaon, mao ang pagpalig-on sa atong lawas aron makasugakod sa mga sakit. Kung dili ka mokaon, ug tugotan ang imong lawas nga maluya, nan dali lang gyud kining mataptan sa mga sakit. Ang mga sakit mosulod mismo sa imong dugo, ug ania ka nga patay na. Kung ang imong dugo dili himsog ug dili-limpyo, bueno, kung ingon-ana, ang sakit mosubay mismo sa imong dugo. Busa kinahanglan kang mokaon og makapabaskog nga pagkaon aron mapapabilin nga maayo ang pagdagayday sa imong dugo. Kay kung dili, dali ka nga matakboyan sa mga sakit. Mao kana ang nagakahitabo sa kadaghan nga mga Cristohanon.

⁹⁹ Sama sa pang-greenhouse nga mga tanum. Kabalo mo, tan-awa n’yo ang pang-greenhouse nga tanum, kinahanglan gyud nimo kining bebe-bebihon. Wala kini hibangkaagan bahin sa panahon. Wala kini hibangkaagan bahin sa kainit sa adlaw ug ingon-anang mga butang, kay dugay kining gipasilong ug gibebi-bebi. Ug mao kana ang nagakahitabo sa daghang mga Cristohanon sa tawag-lang, mga pang-greenhouse sila nga mga tanum. Husto kana, dali ra gyud kaayo sila mataptan og mga insekto! Kabalo mo, kadto lang ang—ang . . . kadto lang mga—mga huyang nga mga tanum ang kinahanglan pang isprihan, o, kadtong mga hybrid nga tanum.

¹⁰⁰ Kabalo mo, adto ka sa usa ka Hereford nga baka ug buhii siya didto sa sibsibanan, ug buhii pud didto ang usa ka longhorn, kana nga longhorn makatultol nga siya ra tungod kay siya orihinal nga lahi. Apan tan-awa n’yo ang usa ka Brangus o usa ka Hereford, nga usa ka crossbreed ug usa ka hybrid, mas maayo ang itsura niini kung tan-awon, sigurado, nga mas tambok ug mas himsog, apan buhii sila didto, dili gyud sila makatultol nga sila ra. Mamatay sila! Kinahanglan man gud silang bebe-bebihon. Kita n’yo?

¹⁰¹ Ug mao kana ang nagakahitabo karon, aduna kita’y mga Cristohanon nga mga mas maayo-binistihan, mas dagkung mga simbahan, ug abunda sa—sa edukasyon, ug sa teolohiya, apan kinahanglan silang kanunay nga bebe-bebihon, kinahanglan nimong motan-aw gamit ang ilang antipara kay kondili wala ka’y unsa man nga makita. Ang atong gikinahanglan maoy puro nga mga Cristohanon, nga mga natawo ilalum sa Dugo ni Ginoong Jesus, nga nagkinabuhi dili gikan sa teolohiya sa

simbahan, kondili gikan sa Pulong sa Dios, nga nagapakig-komunyon kang Cristo. Ang Pulong nga nagatuhop sa magtotoo, nga ang iyang—napalig-on ang iyang espirituhanong lawas. Dili nga masuso pa nga taga-greenhouse!

¹⁰² Adunay usa ka ministro nga miingon karon lang, nadungog ko siya, gisulti niya kini diha sa usa ka pagsibya, ingon niya, nga sa iyang pag-abot niining estado, nagkaproblema siya sa sinus, ug naghisgot na kono sila mahitungod sa pagpa-opera. Ug nasulti nila nga buhaton kono nila ang *ingon niini* ug *ingon niana*, ug paga-operahan siya, ug tangtangan ang usa ka bahin sa glandula niya sa sinus, nga moresulta sa pagkapiyahok sa iyang nawong, ug uban pa nga sama niana. Ug daghan na daw kaayo siya’g nainom nga mga pildoras. Morag daghan kaayo siya’g mga pildoras nga kinahanglan imnon. Apan sa dihang mikonsulta siya sa usa ka maayong Cristohanong doktor, ang maong doktor miingon, “Kalimtan na nato kanang mga pildoras ug kalimtan na nato ang pagpa-opera, ug pabaskogon hinoon nato ang imong lawas para masukolan niini ang sinusitis.” Ingon niana!

¹⁰³ Unsa ma’y hinungdan nga ang mga tawo dili na mabuhi og ingon ka hataas sama kaniadto? Kinahanglan na kita magpabakuna para *niini* ug para *niana*, ug nagatumar sa tanan nang klase sa mga tambal. Unsa may epekto niini? Nagapahuyang kini kanato, nagapatambok, nagapayatyat, ug walay pulos. Sukwahi sa mga tawo kaniadto . . . Aba, na-allergy na man hinoon ta sa tanan. Karon nagkaaduna na sila og mga mal-allergy ug tanan nang uban pa.

¹⁰⁴ Kaniadtong miadto ko sa Africa, wala ko mabakunahan og alang sa malaria. Mao nga kung ang lamok nga nagadala og malaria motugpa sa akong kamot, mataptan gyud ko’g malaria. Dili kaayo saba kini nga mga lamok, ug halos dili nimo sila mamatikdan. Motugpa ra sila, tugpahan ra ka nila, kana ra, ug nataptan na dayon ka. Kung mabuhi ka man, magkaaduna ka niini sulod sa kinse ka tuig. Ug adunay mga higayon nga mamatay ka tungod niini. Ug atua kining mga lumad didto sa ilang gagmay’ng mga payag, nga nagtapok ang mga lamok sa ilang mga bitiis, tungod wala sila’y gisul-ob nga bisti. Mga lamok nga nangtugpa kanila, mga lamok nga nagadala og malaria, ug wala man lang kadto nakapahasol kanila. Ngano man? Dili na man gud sila madutlan. Aduna sila’y bakuna nga hinatag sa Dios.

¹⁰⁵ Ug mao kana ang nagakahitabo karon sa mga tawo. Mao kana ang nagakahitabo sa iglesia. Daghan na kaayo kita’g mga pang-bata nga bakuna ug hinimo’g-tawo nga teolohiya, hangtud nga nasobrahan na gyud kita niini. Ang atong gikinahanglan mao ang pagbakuna nga iya sa Dios pinaagi sa Pulong sa Ginoong Dios. Ang tawo kinahanglan magkinabuhi pinaagi nianang matang sa Pagkaon kada adlaw, aron mapalig-on ang iyang kalag pinaagi nianang pagbakuna batok sa espirituwal

nga mga sakit nga nagakadaghan ug nagakaylap sa tibuok nasud. Aduna pa unta ko'y daghang mga naisulat bahin niini, apan kinahanglan na gyud kong mohunong.

¹⁰⁶ Karon, magmalig-on, mangandam alang sa maong pagpabakuna. Karon, nagkinabuhi kita pinaagi niini, ang atong—ang atong mga lawas kinahanglang magkaaduna niini. Ug, kung wala kita niini nan dali ra gyud kitang matakboyan og lain-laing mga sakit. Ug ang Pulong sa Dios, ingon nga atong ginatoohan Kini ug ginadawat Kini pinaagi sa pagpakig-komunyon, “Ginoo, ang Imong Pulong mao ang Kamatuoran.”

¹⁰⁷ “Ang akong simbahan nagaingon man nga dili nimo kinahanglan nga matawo pag-usab. Ingon nila, ‘Ang pagpakiglamano mao na kono kanang pagkatawo pag-usab.’ Ang ingon nila, ‘Pagwisik-wisik.’ Ginaingon pud nila kining tanang ubang mga butang sama sa, ‘Mao na kana, Amahan, Anak ug Espiritu Santo.’” Apan nagsulti ang Biblia nga magpabautismo sa Ngalan ni Jesus Cristo. Kita n’yo? Sige, padayona n’yo kanang pagdawat n’yo nianang artipisyal nga mga bakuna kung gusto n’yo, ginahimo lang ninyo ang inyong kaugalingon nga artipisyal nga Cristohanon. Kita n’yo? Dili pud ninyo gusto kana.

¹⁰⁸ Dili ka makabaton og Kinabuhi, kondili pinaagi lamang kang Cristo. Ug karon unsa ma’y ginahimo sa Iyang Pulong? Ginahimo Niini nga kusgan ang atong espirituhanong lawas, ginalig-on, sa diha nga nagapakig-komunyon kita Kaniya, aron masukolan ninyo ang yawa.

¹⁰⁹ Moingon ka, “Igsoong Branham, unsa kanang imong ginasulti nga, ‘pagpakig-komunyon sa Iyang Pulong?’”

¹¹⁰ Oo, Siya mao ang Pulong. “Sa sinugdan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo uban kanato.” Ug kita kinahanglan mokaon sa Iyang lawas. Kay ang Iyang lawas mao ang Iyang Pulong, tungod Siya mao ang Pulong. Ug miingon Siya, sa San Juan 15, “Kung kamo nagapabilin Kanako, ug sa Akong pagpakig-komunyon, og ang Akong Pulong, nagapabilin usab diha kaninyo, nan managpangayo kamo sa bisan unsa nga inyong gitinguha ug kini mahitabo alang kaninyo.” Tan-awa. Tinuod gyud kana. Kita n’yo, pangayoa mismo kung unsa ang imong gitinguha!

¹¹¹ Unsa kanang inyong ginabuhat? Ginapalig-on ninyo ang inyong lawas sa pagpabakuna batok sa... Adunay mosulod ug moingon, “Oh, ang among simbahan wala man nagatoo sa pagsinggit-singgit.” Kita n’yo, apan nalig-on na ka. Unsa? Anaa na kanimo ang komunyon, ang Pulong. Ug nabakunahan na ka daan batok niini. Pagmay mosulod nga binuang, unsa man? Pagwalay Pulong niini, nan sigurado gyud ka nga sayup kini. Dili ko igsapayan bisan unsa pa kini ka tinuod tan-awon,

kung dili kini ang Pulong ayaw kini tagda. Oo, ayaw kini panumbalinga. Bisan unsa pa ang buhaton niini, kinahanglan nagakatakdo kini sa Pulong!

¹¹² Samtang nag-ampo ako, gikutlo ko kadtong pulong ni Micheas samtang nagatindog siya didto, atubangan sa Israel, daw sa, daw sa husto gyud kadto, ug kadto nga luna sa yuta ilaha man gyud kadto. Kadtong mga langyaw misulod ug gikuha kini gikan kanila ug nagtukod na sa ilang kaugalingong mga puloy-anan didto, ug ilang giokupar kadtong bahin sa yuta nga gihatag sa Dios sa Israel. Busa mora'g husto gyud kadtong upat ka gatus ka Hebreohanong mga propeta. Apan, kabalo mo, aduna gyu'y sa kung unsa nga pagka-espirituhanon bahin kang Josaphat, ingon niya, "Wala na ka'y lain?"

¹¹³ Miingon, "Aduna pa ko'y lain, apan," miingon pa, "gikasilagan ko siya. Ang iya man gud ginabuhat mao ang pagpanagna og dautan."

Miingon si Josaphat, "Sige ipakuha siya ug paminawon nato siya."

¹¹⁴ Ug miadto didto si Micheas, ug siya miingon, "Padayon, sulong lang mo, apan nakita ko ang Israel nga nagkatibulaag sama sa mga karnero nga walay magbalantay." Ug dayon iyang gisugilon ang iyang panan-awon.

¹¹⁵ Karon, kinsay husto? Mora'g husto gyud kadtong upat ka gatus. Upat ka gatus nga maayong pagkabansay nga mga lalaki, nga nagaingon, "Tumungas ka, kay ang Ginoo nagauban kanimo." Ug bisan si Zedekia adunay usa—usa—usa—adunay usa ka... Adunay gipabuhat kaniadto si Zedekia nga duha ka dagkung sungay nga puthaw. Miingon siya, "Pinaagi niini inyong palayason ang maong mga langyaw gikan sa yuta." Sigurado gyud siya nga husto siya. Nasayod siya nga husto gyud siya. Apan, nakita n'yo, nasayup diay siya.

¹¹⁶ Ug ania, si Micheas, usa batok sa upat ka gatus, ug siya miingon, "Kung motungas mo didto, ang Israel magkatibulaag, nga walay magbalantay."

¹¹⁷ Ug miingon ang uban, "Tumungas ka, kay ang Ginoo magauban kanimo!" Karon, sa materyal nga anggulo, sila husto gayud, kay ang maong dapit iya man sa Israel. Apan ang Pulong sa Ginoo nagkondena na man kang Ahab, busa unsaon man sa Dios pagpanalangin sa Iyang gikondena na?

¹¹⁸ Mao pud kini karon. Kita n'yo? Ang Pulong sa pagpakig-komunyon atua man kang Micheas. Karon, kung nagapakig-komunyon ka sa Dios pinaagi sa pagdawat sa tinuod nga komunyon, ug ang espiritu nga anaa kanimo wala nagauyon niini nga Pulong, wala ka nagapakig-komunyon sa Dios, nagapakig-komunyon ka sa mga yawa. Ug maayo kaayo sila magpakaaron-ingnon! Ang ingon sa Biblia, "Sa katapusang mga adlaw halos ilang malimbongan ang mga Pinili kung mahimo. Apan ang

mga langit ug ang yuta mahanaw, apan ang Akong Pulong dili mahanaw.” Ug kung ang... Si Pablo miingon, diha sa Galacia 1:8, “Bisan pa ang usa ka manolunda gikan sa langit magwali og laing ebanghelyo nga lahi kay sa Niini nga inyong nadungog na, ipatunglo siya.” Bisan pa og manolunda! Sa unang iglesia, sa dihang kadtong mga kalalaken-an, sama nila San Martin, Irenaeus, kadtong diosnon nga mga tawo, pagmay yawa magpakita nga daw sama sa monolunda sa kahayag. Apan, bantayi n’yo, medyo may pagkatipas siya sa Pulong.

¹¹⁹ Nagpakita siya kaniadto kang Eva ingon nga usa ka manolunda sa kahayag, giingnan si Eva, “Oo, gisulti man sa Ginoo *kini*, gisulti man sa Ginoo *kini*,” apan gisupak niya ang Diyos sa katapusan. Ug ingon niana pud ang bakak nga pagpakig-komunyon sa karon. Sa diha nga naghunahuna ang mga tawo nga sila nagaampo sa Dios, ug wala nagatuman sa Pulong, usa kini ka sayup nga pagpakig-komunyon.

¹²⁰ “Kung kamo nagapabilin Kanako, ug ang Akong Pulong anaa kaninyo, nan pangayoa ninyo kung unsa ang inyong gitinguha,” kita n’yo, “ug kini pagabuhaton.” Karon, dili kini mahimo nga okey sa usa ka higayon, dayon dili na okey sa sunod. “Kamo nga nagapabilin Kanako, nga ang Akong mga Pulong nagapabilin kaninyo,” ang pasabot niana, magpabilin dinha. Ang *pabilin* nagapasabot og “magpuyo dinha, magpabilin mismo dinha.” Oo, kini—kini ang pagpabakuna batok sa makasasala nga mga sakit.

¹²¹ Karon, tugoti ako sa pagtapos pinaagi sa pagpahayag niining usa ka pulong karon, sa dili pa kita moduol sa lamesa sa komunyon. Sa Dugo ug Lawas sa Ginoo, nga inubanan og pagtoo, kanang Dugo ug Lawas, nga mao ang Espiritu ug ang Pulong, pag-gisagolan kini og pagtoo, ang tumbas niini mao ang Kinabuhing Walay Katapusan. “Ang mokaon sa Akong Unod ug moinom sa Akong Dugo adunay Kinabuhing Walay Katapusan, ug banhawon Nako siya sa katapusan nga adlaw.” Mao kana. Unsa kini? Ang pagpakig-komunyon ngadto sa Ginoo. Ang Pulong ug ang Espiritu, kining Kinabuhing anaa sa Dugo, ang Pulong ug ang Espiritu, katumbas og Kinabuhing Walay Katapusan, pinaagi sa pagtoo sa Ginoo.

¹²² Ania ang akong pag-ampo, maingon nga nakita ko nga haduol na ang katapusan ug nakita ko nga unsa mang takna, mahimong adunay mahitabo, ug sa pagkahibalo nga dili na gyud kita halayo sa Pag-abot sa Ginoo:

Ginoo, kung ingon niana sa Ngalan ni Ginoong Jesus, ang Anak sa Dios, tugoti ako nga kuhaon ang Pulong, nga mao ang Espada, ug iwarawara Kini uban sa pagtoo nga ania kanako, ug tagbasaon ang matag gahum sa demonyo sa akong agianan, hangtud nga makita ko si Jesus, pinaagi sa pagpakig-komunyon sa Iyang Pulong.

¹²³ Pagpakig-komunyon sa Iyang Pulong. “Kung kamo nagapabilin Kanako, ug ang Akong Pulong nagapabilin kaninyo, nan pangayoa sa Ako kung unsay inyong gitinguha ug kini pagabuhaton alang kaninyo.” Pagkaanindot gayud! Mao kana ang tinuod nga pagpakig-komunyon sa Pulong ug sa Espiritu, inubanan og pagtoo aron dungan Kining ipataas, “Pangayoa kung unsa ang inyong gitinguha, ug kini pagabuhaton alang kaninyo.” Mag-ampo kita.

¹²⁴ Maloloy-on ug Halangdon nga Balaang Amahang Dios, ang gamhanang MAO AKO, ang El Shaddai, ni Abraham. Oh Dios, daw sa unsa ka mahinugdanon ang pagpakig-komunyon sa Ginoo nga katumbas sa Kinabuhing Walay Katapusan, ug kung unsa nga Kini nagapangbakuna gikan sa garbo, kung unsa nga Kini nagapangbakuna gikan sa dili-pagtoo, kung unsa nga Kini nagapangbakuna gikan sa sala sa kalibutan! Kini ang pagpakig-komunyon, nga may Balaang gugma ngadto sa atong Langitnong Amahan. Ug pinaagi sa pagkamatarung ni Jesus Cristo makaduol kami niini nga lamesa. Ug nangamuyo kami, Ginoo, nga Imong ihatag sa matag usa kanamo ang maong katungod sa pagduol karong gabhiona, diha sa Espiritu. Pasayloa kami. Ug gitinguha namo ang pagtubo sa among espirituhanong mga lawas. Wala kami kaikag mahitungod niining mga pagpamiyembro sa kung unsa nga iglesia o denominasyon. Ang tinguha namo mao ang mapalig-on ang espirituhanong lawas, ang mabakunahan gikan sa sala, hangtud nga moabot sa punto diin dili na kami ganahan sa pagbuhat og sayup, ug diin ang Balaang Espiritu mahimong gamiton ang Iyang Kaugalingong Pulong ug ang among mga ngabil, ug ipamulong Kini nga ingon ka lab-as sama kaniadtong adlaw nga gipamulong Kini, tungod kay Kini mao ra nga Espiritu nga anaa kaniadto kang Ginoong Jesus. Nagaampo ako, Amahan, nga Imong ihatag kini kanamo.

¹²⁵ Ang panahon patapos na. Kung kanus-a gayud, wala kami nasayod, kanang kung kanus-a gyud maluwas ang kinaulahiing pinili. Apan nagaampo ako karong gabhiona, Ginoo, kung aduna ma’y ania dinhi nga wala pa makaila Kanimo ingon nga ilang Manluluwas, hinaut nga makaplagan Ka nila karong gabhiona sa ilang pagduol niining tubig pang-bautismo, isip usa ka pagdumdum, sa ilang pagsugid atubangan niining pundok sa mga magtotoo nga sila nagatoo sa maong sugilanon nga si Jesus nga Nazaretnon natawo sa ulay nga si Maria, ug gipatay, gilansang sa krus ni Poncio Pilato, ug gibanhaw sa Dios sa ikatulong adlaw, ug nagalingkod sa tuong kamot sa Iyang Pagka-Halangdon, karong gabhiona, nga buhi hangtud sa kahangturan aron sa pagpangaliya.

¹²⁶ Itugot, Ginoo, nga kanang maong tawo, magatuman sa mga sugo sa Biblia, “Maghinulsol, ang matag usa kaninyo, ug managpabautismo sa Ngalan ni Jesus Cristo alang sa

kapasayloan sa inyong mga sala. Kay wala na'y laing ngalan sa silong sa Langit nga gikahatag ngadto sa mga tawo nga pinaagi niini mamaluwas kamo." Oh Dios, hinaut nga makita sa mga tawo ang pagkasinsero niini, ug ang kalig-on sa Imong Pulong, "Wala na'y laing ngalan sa silong sa Langit nga gikahatag ngadto sa tawo nga pinaagi niini mamaluwas kamo, apan pinaagi lamang sa Ngalan ni Jesus Cristo." Tungod niini, ang apostol miingon, "Paghinulsol, ang matag usa kaninyo ug managpabautismo sa Ngalan ni Jesus Cristo alang sa kapasayloan sa inyong sala, ug kamo makadawat sa gasa sa Espiritu Santo. Kay ang saad alang sa tanang kapanahonan, sumala sa kadaghanon sa tawo nga pagatawgon sa atong Ginoong Dios." Itugot, Ginoo, nga adunay igong gidaghanon nga pagatawgon karong gabhiona.

¹²⁷ Ug gisulti kini usab, sa among Ginoo, "Walay tawo nga makaduol Kanako gawas kung pagadanihon siya sa Akong Amahan, ug ang tanan nga gihatag Kanako sa Amahan magaduol Kanako. Ang Akong mga karnero nagapatalinghug sa Akong Tingog." Ang usa ka dumuloong, ug kung mamulong ang usa ka dumuloong, nga usa ka tingog nga dili sumala sa kasulatan, mahibaloan dayon kini sa karnero. Oh Dios! Pero kung ang Imong Tingog kini, ang Biblia, unsa man ang ginaingon Niini, patalinghugan Kini sa matag karnero, tungod kay Pagkaon man Kini sa karnero. Nakipag-komunyon sila. Nasayod gyud sila kung unsang klase nga Pagkaon ang ginapakaon sa Amahan. "Ang tawo dili mabuhi sa tinapay lamang, kondili pinaagi sa matag Pulong nga nagagula sa baba sa Dios." Itugot, Ginoo, nga daghan ang makakita ug makasabot, ug moduol Kanimo karong gabhiona.

¹²⁸ Kadtong wala pa'y Balaang Espiritu, hinaut nga dili nila langanon Kini sa dugang pang oras. Tingali ulahi na kaayo para sa dugang pang oras. Tingali wala na sila dinhi.

¹²⁹ Ug, Amahan, sa dihang nanagtigum kami karon sa lamesa aron dawaton kining representasyon sa Imong gipikaspikas nga lawas, nagaampo kami nga kon aduna ma'y sala sa among taliwala, Ginoo, pasayloa kami. Miingon Ka, "Kung kamo managkatigum, maghinulatay ang usa'g usa kaninyo." Dios, kung adunay sala niini nga kongregasyon, bisan asa man, nagaampo ako nga ang Dugo ni Jesus Cristo magpahimulag nianang tawhana gikan sa iyang sala, o nianang babaye, batan-ong lalaki o batan-ong babaye. Ug, Amahan, nagaampo ako alang sa akong kaugalingon, nga Imo akong ipahimulag sa tanang pagduhaduha, sa tanang sala, sa tanang dili-pagtoo, bisan unsa nga . . . Nasayod kami nga ang dili-pagtoo mao ang sala. Kini mao lamang ang bugtong sala. "Ang dili nagatoo nahinukman na sa silot." Ug ang bugtong sala, mao lamang ang dili pagtoo sa Pulong sa Dios. Ug, Amahan, kung adunay bisan unsa nga dili-pagtoo nga anaa kanako, pasayloa ako, Oh Dios,

nga aduna man gud og daghan, ug ako nagaampo nga Imo akong pasayloon. Pasayloa ang akong kongregasyon nga Imong gihatag kanako karong gabhiona, ug pakan-a sila sa Pulong. Itugot kini.

¹³⁰ Ug samtang nagadawat kami niining gagmay nga mga paghandum sa gipikaspikas nga lawas Niya Nga nabanhaw gikan sa mga patay ug nabuhi hangtud sa kahangturan nga anaa sa among taliwala, hinaut nga makadawat kami og komunyong gikan Kaniya, Ginoo, ang pagpakig-komunyong sa Espiritu Santo. Itugot kini, Amahan. Ginapangamuyo namo kini sa Ngalan ni Jesus. Amen.

¹³¹ Karon, alang kaninyo nga kinahanglan nang mouli ug dili na makapabilin sulod sa mga kinse-ka-minuto nga panerbisyo alang sa komunyong... Aduna'y pipila lang kanato, ug kita mag-aambit sa komunyong. Dili kini usa ka komunyong nga para sa kanamo lang. Kini alang sa matag Cristohanong magtotoo. Ang Dios wala nagbutang og linya tali sa Baptist ug Methodist, ug uban pa. Kitang tanan, pinaagi sa usa ka Espiritu, gibautismohan ngadto sa usa ka Lawas, ug kita mga isigka-lungsoranon sa Ginghamlan sa Dios. Ug kung aduna ma'y usa kanato nga bag-ohan ra, wala man ko kanunay dinhi, ug wala ko mahibalo kung kinsa ang mga miyembro ug kinsa ang dili. Hinumdumi, bisan unsa nga iglesia ka man nahisakop, kana walay kalambigitan niini. Aduna lamang og usa ka Iglesia, mao na, ug dili ka nagapamiyembro Niini, natawo ka sulod Niini. Husto kana. Ug natawo ka sulod niining Iglesia sa Dios. Ug kami nagaampo nga imong dawaton si Cristo karong gabhiona, magpakig-komunyong Kaniya samtang atong pamalandongan ang Iyang gipikaspikas nga lawas, ug kining gagmay nga mga elemento nga atong gipanag-ambitan, nga pagpahinumdong sa paskuwa, ug hinaut nga pagabuboan og Dugo sa Dios ang atong mga kasingkasing ug konsensya.

¹³² Karon ila nang kuhaon ang komunyong, ug atong basahon karon gikan sa Unang Mga Taga-Corinto, sa ika-12 nga kapitulo. Ug kita mosalmot na dayon sa komunyong pagkahuman niini, ug nagasalig kami nga ang Dios mopanalangin kaninyo sa madagayaon gayud. Pakahaman nato'g basa niini, o sa dili pa nato kini basahon, kung kinahanglan na ninyo nga mobiya, bueno, puede na mo makagawas. Ug dayon tambong mo pag-usab uban namo sa Miyerkules sa gabii, ug sa Dominggo sa buntag ug sa Dominggo sa gabii. Kung makapabilin ka aron modawat sa komunyong uban kanamo, malipay gayud kami nga buhaton nimo kini. Dayon pagkahuman niana, mao ang Ginoo... mao ang panerbisyo sa pagbautismo, nga magsugod nga kinse ka minuto human niana, o baynte minutos og taas na naa, sa akong pagtoo. Unang Mga Taga-Corinto, ang ika-11 nga kapitulo, sa ika-23 nga bersekulo.

...Gidawat ko gikan sa Ginoo ang gihatag ko usab kaninyo, Nga ang Ginoong Jesus sa gabii... nga

gitugyan siya, mikuha ug tinapay:

Ug sa nakapasalamat na siya, gitipiktipik niya, . . . miingon, Kumuha kamo, ug kumaon kamo: kini mao ang akong lawas, nga ginatipiktipik tungod kaninyo: buhaton ninyo kini sa handumanan nako.

Sa mao usab nga paagi, mikuha siya sa copa, ug sa human ang panihapon, nga miingon, Kini mao ang copa sa bag-o nga tugon sa akong dugo: buhaton ninyo kini, sa tanan nga pag-inum ninyo niini, sa handumanan nako.

Kay sa gihapon nga mokaon kamo niining tinapay, ug moinum niining copa, ang kamatayon sa Ginoo mao'y ginamantala ninyo hangtud nga moanhi siya.

Busa bisan kinsa nga dili mokaon niining . . . bisan kinsa nga mokaon niining tinapay, kun moinum niining copa sa Ginoo, sa paagi nga dili takus, magamalapason sa lawas ug sa dugo sa Ginoo.

Apan ang tagsatagsa magsusi sa iyang kaugalingon, ug sa ingon niana mokaon siya sa maong tinapay, ug moinum sa maong copa.

Kay ang mokaon ug moinum nga dili-takus, nagakaon ug nagainum sa hukom sa iyang kaugalingon, kong wala niya paggahina ang lawas sa Ginoo.

Tungod niini nga hinungdan, daghan kaninyo ang mga masakiton ug mga mahuyang, . . . pipila kaninyo nakatulog.

Apan kong nagasusi pa unta kita sa atong kaugalingon, dili kita unta mahukman.

Apan kong mahukman kita, pagasilotan kita sa Ginoo, aron kita dili mahinukman sa silot uban sa kalibutan.

Busa, mga igsoon ko, kong kamo managkatigum sa pagkaon, maghinulatay ang usa'g usa kaninyo.

¹³³ Karon, mogahin kita ug hamubo lamang nga gutlo sa hilum nga pag-ampo alang sa matag usa kanato, iampo ninyo ako samtang nagaampo ako alang kaninyo. [Nagaampo si Igsoong Branham nga hinay—Ed.] . . . ? . . .

Ihatag kini nga mga pangaliyupo, Dios nga Makagagahum. Pasayloa kami sa among mga sala sama sa among pagpasaylo sa mga nakasala kanamo. Kini among ginapangamuyo sa Ngalan ni Jesus Cristo. Amen.

¹³⁴ Kining gagmay'ng mga tipik sa tinapay nga kosher nga gihimo nga walay mantika, panimpla, ug uban pa, nga nagrepresentar sa lawas sa Ginoo. Dili kini lingin, apan gipikaspikas kini sa daghang mga bahin. Kay kini nagsimbolo sa Iyang napikaspikas nga lawas nga nalugti alang kanato.

Ug hinaut nga ang Dios maghatag sa Iyang mga panalangin sa tanan nga mokaon niini. Karon, kini dili ang lawas, kini nagrepresentar lamang sa lawas. Wala ako'y gahum, ni bisan kinsa, ang makapausab niini ngadto sa bisan unsa nga butang gawas sa tinapay. Ang Dios lamang. Ug mao kana ang Iyang gisulti kanato, nga kaonon kining tinapay ug imnon kining kopa sa vino. Karon atong iduko ang atong ulo.

¹³⁵ Labing Balaan nga Dios, Kansang mga alagad kami, sa Ngalan ni Jesus Cristo, balaana kini nga tinapay alang sa gitakda nga katuyoan niini, aron nga, sa among pag-ambit niini, mahinumduman namo ang among Ginoo nga gilansang sa krus; ug ang Iyang lawas, nga ingon ka bililhon ug balaan, nag-antus sa mga labod ug mga tunok ug mga lansang, alang kanamo, nga pinaagi sa Iyang nagkagidlay nga lawas migula ang Espiritu nga maoy naghatag kanamo sa Kinabuhing Walay Katapusan. Hinaut nga kami, Ginoo, sa among pag-ambit niini, makadawat og grasya alang sa among panaw, sama sa nabatonan sa Israel sa ilang kuwarenta ka tuig didto sa kamingawan, ug walay bisan usa ka mahuyang nga tawo sa taliwala kanila. Amahan nga Dios, ihatag kini, sa dihang kami nagaampo nga Imong balaanon kini nga tinapay, kining kosher nga tinapay, alang sa gitakda nga katuyoan niini. Sa Ngalan ni Jesus. Amen.

¹³⁶ Ang kopa sa Bag-ong Pakigsaad, ang Dugo. Akong nahinumdum kanang awit:

Sukadsukad nga pinaagi sa pagtoo nakita ko
kadtong agas
Nga sa Imong nagabuhagay nga samad
nagagikan,
Gugmang nagatubos mao na'y akong tema,
Ug mamaingon niana hangtud nga ako
mamatay.

¹³⁷ Sa dihang nakita ko kini nga duga, gikan sa ubas, ang duga sa mga ubas, naila ko nga kini nagrepresentar sa Dugo nga midagayday kaniadto gikan sa lawas ni Ginoong Jesus. Hinaut nga ang si bisan kinsa nga modawat niini makabaton sa Kinabuhing Walay Katapusan, hinaut nga ang sakit mobiya sa ilang mga lawas, hinaut nga ang mga kakapoy ug kaluya, pagkalinupigan, hinaut nga ang yawa (sa tanang porma) mobiya kanila, aron sila makabaton og dakung kusog ug kahimsog ug Kinabuhing Walay Katapusan, aron mapadan-ag nila ang ilang kahayag taliwala niining dautan ug mananapaw nga kaliwatan nga among gikahimutangan, sa paghimaya sa Dios.

¹³⁸ Langitnong Amahan, ginatugyan namo Kanimo kining bunga sa punoan sa parras. Sa Ngalan ni Jesus Cristo, balaana kini, nga nagrepresentar sa Dugo sa Imong Anak, nga si Jesus, nga diha Niini nabatonan namo kining, "Gisamaran tungod sa among mga kalapasan, pinaagi sa Iyang mga labod kami

nangaayo.” Itugot, Ginoo, nga moabot kanamo ang maong Kinabuhi, ang Kinabuhing Walay Katapusan sa kadagaya niini, aron mas maalagaran Ka namo pag-ayo, nga magkaaduna kami’g kusog ug kahimsog aron mahimo namo ang pag-adto sa mga dapit diin kami ginapaabot sa pagpangalagad Kanimo, bisan asa man Nimo kami pagatawgon. Itugot kini nga mga panalangin, sa Ngalan ni Jesus, kami nagapangamuyo. Amen.



62-0204 Komunyon
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org